

事文類聚

後集

五十一、五十二

左
61
乙

漢書門	類	號	函	架	冊
六	一	二	六	一	五
二	六	一	五	二	一

事文類聚	後集	卷	第	幾
六	一	二	六	一
二	六	一	五	二

内閣文庫	
番號	漢 6126
冊數	61 (27)
函號	365 31



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak



綴じ部（喉部分）の文字等が開きが不鮮明な箇所あり

事文類聚後集

四十六之七

廿一

2
51

館書圖京東			
三	六	五	別
冊	號	架	函
			漢書門 類書類

不許帶出



新編

古今事文類聚卷之四十六

後集

禮書

建安祝

穆和父編

羽蟲部

雞

同書

淺草文庫

羣書要語

雞大者曰蜀雞未成曰健三尺為
鷄絕有力曰奮爾雅雞為積陽火

德之精故陽出雞鳴以類感也春秋題辭桃都

山有大樹曰桃都枝相去三千里上有天雞日
初出照此木天雞即鳴天下雞皆隨之玄中記

雞人掌夜呼旦詔為官周禮巽為雞易牝雞無

晨牝雞之晨惟家之索商書祭宗廟之禮雞曰

翰音禮記子事父母雞初鳴咸盥漱曲禮雞棲

于埽注鑿垣而棲為埽棲於椳為祭國風五母

雞孟子雞鳴犬吠相聞以達乎四境同上雞司

晨蜀揚顯傳雞有專棲之雄抱朴子連雞不能

俱上於棲戰國策鳴雞戒旦則飄爾晨江文選

趙景真書

詩句雞聲茅店月温庭筠鄰雞凍不歌山谷晨

雞喔喔鳴劉禹錫夜半金雞啁晰鳴韓黃雞催

曉丑時鳴白樂天

古今事實

雞鳴為善

雞鳴而起孳孳為善者舜之徒也孟子

聞雞相警

雞鳴思賢妃也哀公荒淫怠慢故陳賢妃貞女

夙夜警戒相成之道焉雞既鳴矣朝既盈矣匪

雞則鳴蒼蠅之聲蟲飛薨薨甘與子同夢會且

歸矣無庶予子憎齊風女曰雞鳴刺不悅德也

陳古義以刺今不悅德而好色也女曰雞鳴士

日昧旦子興視夜明星有爛將翔將翔弋鳧與
鴈鄭風

風雨不渝

風雨思君子也亂世則思君子不改其度焉風
雨淒淒雞鳴喑喑既見君子云胡不夷風雨瀟
瀟雞鳴膠膠風雨如晦雞鳴不已

殺雞為黍

子路遇丈人以杖荷篠止子路宿殺雞為黍而
食之

出犬雞詛

鄭伯使行出犬雞以詛射穎考叔者

自斷其尾

賓孟適郊見雄雞自斷其尾問之侍者曰憚其
為犧也昭公二十三年

雞有五德

田饒事魯哀公而不見察告哀公曰臣將去君
黃鵠舉矣哀公曰何謂也饒曰君不見夫雞乎
頭戴冠者文也足搏距者武也敵在前敢鬪者
勇也見食相呼者仁也守夜不失時者信也雞
雖有五德君猶日瀾而食之者何也以其所從

來近也夫鵠一舉千里止君園池食君魚鱉啄君黍梁無此五德而君猶貴之以其所從來者遠也韓詩外傳

雞鳴度關見關市門

雞犬識家見育聖門

雞犬得仙見神仙門

獻長鳴雞

成帝時交趾越雋獻長鳴雞司晨雞即下漏驗之晷刻無差長鳴一食時不絕長距善鬪西京

雜記

姑盜食雞見姑婦門

呼雞祝祝

祝雞翁雒陽人居尸鄉北山下養雞百餘牢雞皆有名字千餘頭暮棲于樹晝日放散呼名即種別而至列仙傳祝雞翁善養雞今世人呼雞云祝祝起此也博物志俗傳雞本朱氏翁化為之故呼雞皆曰朱朱風俗通

雞肋可惜

魏王入漢中討劉備不得進欲守復難意欲棄之乃發令云雞肋官屬不知主簿楊脩曰夫雞

助棄之則可惜噉之無所得王遂還九州春秋

聞雞起舞

晉祖逖與劉琨俱為司州主簿情好綢繆共被而寢中夜聞荒雞鳴琨覺曰此非惡聲也因起舞相謂曰若四海鼎沸豪傑並起吾與足下當相避於中原

火雞燒營

殷浩北伐辟江道為長史取雞百餘隻以長繩連之腳皆繫火一時驅放羣雞駭散過塹飛集羗營皆燃因其驚亂眾兵擊之

宋窻雞

晉兗州刺史沛國宋處宗嘗買得一長鳴雞愛養甚至常籠著窻間雞遂作人語與處宗談論極有玄致終日不輟處宗因此玄乃大進幽冥錄決爭雞訟見官政明

知吏食雞

宋世良為清河太守發姦摘伏嘗有一吏休滿遠郡食人雞豚世良叱而語之叩頭伏罪北史

古今文集

雜著

衛士傳雞唱

光黃人二三月羣聚謳歌不中音律宛轉如雞
鳴耳與官人唱漏微相似但極鄙野漢官儀宮
中不畜雞汝南出長鳴雞衛士候於朱雀門外
專傳雞唱又應劭曰今雞鳴歌晉太康地道記
曰後漢衛士習此曲於闕下歌之今雞唱是也
志林

雞鳴賦

張文潛

先生閑居學道昧旦而興家畜一雞司晨而鳴
畜之既老語默有程意氣武毅被服鮮明戢戢

朱冠丹頸玄膺蒼距矯攫秀尾翹騰奉職有恪
徐步我庭啄粟飲水孔肅靡爭山川蒼蒼風霰
宵凝黯幽窻之統統恍餘夢之初驚萬里一寐
鍾鼓無聲聞振衣之膈膊忽孤奏之泠泠委更
籌之雜亂和城角之淒清應雲外之鳴鴻吊山
巔之落星歌三終而復寤夜五分而既更萬境
皆作車運馬行先生杖屨而生觀大明之東生

古詩

縛雞行

杜甫

小奴縛雞向市賣雞被縛急相喧爭家中厭雞
食蟲蟻不知雞賣還遭烹蟲雞於人何厚薄吾

叱奴兒解其縛雞蟲得失無了時注目寒汀倚
江閣

洪容齋云此詩自是一段好議論至結句
之妙非它人所能企及也

雞啼曲

李廓

星稀月沒入五更膠膠角角雞初鳴
征人牽馬出門立辭妻欲向長安行
再鳴引頸茅簷下樓中角聲催上馬
纔分地色第三鳴旌旆紅塵已出城
婦人上城亂招手夫婿不聞遙哭聲
長恨雞鳴別時苦不遣雞栖近窻戶

律詩

雞

杜甫

紀德名標五初鳴度必三殊方聽有異
失次曉無慙問俗人情似充庖爾輩堪
氣交亭育際巫峽漏司南

雞

司馬君實

羽短籠深不得飛久留寧爲稻梁肥
膠膠風雨鳴何苦滿室高眠正掩扉

鬪雞

羣書要語

金背鐵距六帖前看如倒傍視如

傾頭象規作背似削成高膺峭峙

雙翅齊平躍身竦體怒勢橫生爪似煉銅目如

奔星揚翅因風撫翮長鳴猛志橫逸勢凌天庭

或躑躅踟躕嘒喋容與或爬地俯仰或撫翼未

舉或狼顧鴉視或鸞翔鵠舉或佯背而引敵或

畢命於強禦得勢者凌九天失據者淪九地博

玄賦

古今事實

芥其雞

季郈之雞鬪

季平子郈伯二家相近故雞鬪

季氏芥其雞

將芥其羽或曰以膠沙播之為芥也

且讓之故郈伯亦怨平子昭公六年

紀渚子為周宣王養鬪雞十日而問之雞可鬪

養鬪雞

乎曰未也方虛驕而恃氣十日又問之曰未也

猶深視而盛氣十日又問之曰幾矣望之如木

雞其德全矣異雞無敢應者也列子

狸膏塗頭

莊子謂惠子曰羊溝

處鬪雞之雞三歲為秣

秣也

也

相者視之則非良雞也然數以勝人者以狸膏塗其頭也雞畏狸故也

好鬪雞

宣帝好鬪雞

鬪雞賭錢

扶南山范尋以鐵為鬪雞假距與諸將賭錢吳外國傳

鬪雞兵象

元宗好鬪雞貴臣外戚皆尚之貧者或弄木雞識者以為雞酉屬帝生之歲也鬪者兵象近雞

禍也五行志

以鬪雞進

楊國忠以鬪雞進楊妃外傳

古今文集

雜著

說天雞

羅隱

祖氏子不得父術而得雞之性焉其父畜養者冠距不舉毛羽不彰兀然若無飲啄意泊見敵則他雞之雄也伺晨則他雞之先也故謂之天雞祖氏死傳其術於子且反先人之道非毛羽

彩錯甯距銛利者不與其棲無復問向時伺晨
之儔見敵之勇義冠高步飲啄而已吁道之壞
矣有是夫

古詩

鬪雞聯句

韓愈孟郊

大雞昂然來小雞竦而待崢嶸顛盛氣洗刷凝
鮮彩高行若矜豪側睨如同殆精光日相射劍
戟心獨在既取冠為冑復以距為鍛天時得清
寒地利挾爽塏磔陟格反毛各噤瘁所錄反怒癭爭
礮石俄膺忽爾低植立瞥而改臍膊戰聲喧噴

翻落羽雉中休事未決小挫勢益倍妬腸務生
敵賊性專相醢裂血失鳴聲啄烏閑反甚肥餒
對起何急驚隨旋仍巧給毒手飽李陽神槌困
朱亥惻心我以仁碎首爾何罪獨勝事有然傍
驚汗流浼知雄欣動頰怯負愁看賄爭觀雲填
道助叫波翻海爭爪深難解嗔晴時未息一噴
一醒然再接再礪乃頭垂碎丹砂翼塌拖錦彩
連軒尚賈餘清厲比歸凱選俊感收毛受恩慙
始隗英心甘鬪死義肉耻庖宰君看鬪雞篇短
韻亦可採

晚泊觀鬪雞

梅聖俞

舟子抱雞來雄雄峙高岸側行初取勢俯啄示
無憚先鳴氣益振奮擊心非憚勇頸毛逆張怒
目皆裂吁血流何所爭死鬪欲充玩應當激猛
毅豈獨專晨旦勝酒人自私粒米誰爾喚紆懷
彼與魏傍睨當衰漢徒然驅國衆曾靡救時難
羣雄自苦戰九錫邀平亂寶玉歸大姦干戈託
竒筭從來小資大聊用一長歎

律詩

鬪雞東郊道

陳褚玠

春郊鬪雞侶捧敵兩逢迎妬羣排袖出帶勇向
場驚錦毛侵距散芥羽雜塵生還同戰勝罷耿
介寄前鳴

鬪雞

陳無已

崢嶸已介季氏甲更以黃金飾兩戈雖有英心
甘鬪死其如紀渚木雞何

山雞

羣書要語

一名錦雞

爾雅

山雞有美毛自愛

其毛終日影水目眩則溺

博物志

鷓鴣山雞也利距善鬪世以家雞鬪之則可擒
其色鮮明五采炫耀南越志巴峽中有吐綬雞
以其羽毛有白圓點又名真珠雞喙歲肉綬長
闊數寸紅碧相間極煥爛常時不見須遇晴日
則向陽擺之頂首先出兩角肉亦二寸許然後
徐舒其綬踰時悉斂於喙下披其毛不復見或
有死者割其頸臆間亦無所覩倦遊雜錄

詩句 歲蕤輕風裏若銜若垂何可擬 李文饒

古今事實

鏡照而舞

魏武帝時南方獻山雞帝欲其鳴舞而無由公
子蒼舒令以大鏡著其前雞鑑形而舞不知止
遂至死韋仲將為之賦 異苑

古今文集

古詩

錦雞

歐陽永叔

蠻荆鮮人秀厥美為物怪禽鳥得之多山雞稟
其粹眾彩爛成文真色不可繪仙衣霓紛披女
錦花繚綵輝華日光亂眩轉目精憊高田啄秋
粟下澗飲寒瀨清唳或相呼舞影還自愛豈知

文章累遂使羅網掛及禍誠有媒求友反遭賣
有身乃吾患斷尾亦前戒不羣世所驚甚美衆
之害稻梁雖云厚樊紲豈爲泰山林歸無期羽
翻日以鍛用晦有前言書之可爲戒

吐綬鳥

劉禹錫

越山有鳥翔廖廓嗟中天綬光若若越人偶見
而竒之因名吐綬江南知四明天姥神仙地朱
鳥星精鍾異氣赤玉雕成彪炳毛紅綃剪出玲
瓏翅湖煙始開山日高迎風吐綬盤花條臨波
似染琅玕草映葉疑開王母桃花紅草綠人間

事未若靈禽自然貴鶴吐明珠暫報恩鵲銜金
印空爲瑞春和秋霽野花開玩景尋芳處處來
翠幙雕籠非所慕珠丸柘彈莫相猜棲月啼煙
陵縹緲高秋先見金霞曉三山仙路寄遙情刷
羽揚翹砍上征不紫碧雞依井絡願隨青鳥向
層城大液池中有黃鵠憐君長向卑枝宿何如
一借羊角風來聽簫韶九成曲

律詩

山雞

溫庭筠

石磴動晴景山禽陵翠微繡翎翻草去紅觜啄

花歸巢暖碧雲色影孤清鏡輝不知春樹畔何處又分飛

錦雞

王介甫

樊籠寄食老低摧組麗深巖肯自媒天日清明聊一吐兒童初見互驚猜

鴈

鴻附

君羊書要語

鳧鴈之醜其脚指間有膜蹠屬相著爾雅鳴鵝倉鳴鴈也廣雅季冬

之月鴈北鄉月令大夫執鴈取其候時而行也

婚禮納采用鴈

儀禮

凡贄大夫用鴈鴈有先後

行列故以為贄

繁露

兄弟之齒以鴈行禮記鴈

銜蘆以避矰繳

淮南子

譬若江湖之雀渤澥之

鳥乘鴈集不為之多雙鳧飛不為之少

解嘲

梁

州界有鴈塞山相傳此山有大池水鴈棲集故

名鴈塞

梁州記

衡州有回鴈峯鴈至此不過遇

春而回

郡志

鴻鴈

鴻鴈春北而秋南不失其時

管子

大曰鴻

小曰鴈

詩

鴻鵠羽毛純白似鶴而大肉美如

鴈

同上

孟春之月鴻鴈來季秋之月鴻鴈來賓

月令鴻漸于陸其羽可用為儀吉漸卦魚網之

設鴻則離之新臺鴻飛遵渚公歸無所於女信

處狼跋鴻飛冥冥弋人何慕焉揚子翼乎如鴻

毛之遇順風王褒頌

寄書雲間鴈范彦龍

金風新過鴈邊秋一鴈聲別浦鴈賓秋

宿鴈聚圓沙落鴈浮寒水杜並戰蒲知鴈嘒李

義山萬里衡陽鴈今年入北歸杜鴻鴈幾時過

江湖秋水多杜遵渚有來鴻謝元暉殘星幾點

鴈橫塞杜驚起暮天沙上鴈海門斜去兩三行

並杜牧仙掌月明孤影過長門燈暗數聲來杜

北風驅鴈天兩霜鮑照

古今事實

烹不鳴鴈

莊子出於山舍故人之家今豎子請曰其一鴈能鳴其一不能鳴請奚殺主人曰殺不能鳴者弟子問曰主人之鴈以不材而死先生何處焉莊子笑曰周將處夫材與不材之間乎

彎弓鴈落

庾盈侍魏王見一鴈過曰臣能搖弓而落乃彎弓

鴈即落家語

鴈足繫書見書簡門

作朱鴈歌

漢武帝幸東海獲赤鴈作朱鴈之歌

在郡食鴈

後漢度遼將軍皇甫規解官東歸安定鄉人有以貨買鴈門太守者亦去職還家書刺謁卧不迎既入而問鄉前在郡食鴈美乎

射鴈貫錢

晉朱漢賓少時善射嘗因與同輩出獵指一飛鴈隨矢而落其鏃正中其臆臆上貫一金錢有篆文示其郡之碩學皆無識者人甚異之由是號為朱落鴈

鴻鴈安集 以下係鴻鴈

鴻鴈美宣王也萬民離散不安其居而能勞來還定安集之至於矜寡無不得其所焉鴻鴈于飛集于中澤之子于垣百堵皆作雖劬勞其究安宅

獻鴻道飛 或以為鶴見鶴門

猶鴻有翼

桓公在位管仲隰朋見立有間有二鴻飛過桓公歎曰仲父今彼鴻鵠有時而南有時而北四方無遠所欲至而至焉唯有羽翼之故寡人有仲父猶飛鴻有羽翼也

戒食射鴻

衛獻公戒孫文子甯惠子食皆服而朝日旰不召而射鴻於圃二子從之公不釋皮弁而與之言二子怒如戚左傳

鴻安可龍

晉郭瑀隱於臨蕪谷張天錫使蓋公明徵之瑀指翔鴻以示之曰此鳥也安可龍哉遂深迹跡公明拘其門人瑀歎曰吾逃祿非逃罪也豈得隱居行義害及門人乃出就徵

養鴻賞翫

盧思道遷武陽太守為孤鴻賦曰有離羣之鴻為羅者所獲野人馴養貢之於余置諸池庭朝夕賞翫用以銷憂賦序

古今文集

雜著

南人捕鴈

鴈宿於江湖之岸沙渚之中動計千百大者居
其中今鴈奴圍而警察南人採捕者俟其天色
陰暗或無月時於瓦罐中藏燭持棒者數人屏
氣潛行將欲及之則畧舉燭便藏之鴈奴驚叫
大者亦驚頃之復定又如前舉燭鴈奴又驚如
是數四大者怒啄鴈奴秉燭者徐逼之更舉燭
則鴈奴懼啄不復動矣乃高舉其燭持棒者齊
入羣中亂擊之所獲者甚多昔有淮南人張疑
評事話之此人親曾採捕 玉堂閑話

古詩

詠湖中鴈

沈約

白水滿春塘旅鴈每迴翔
淒流牽弱藻斂翮帶
餘霜羣浮動輕浪單泛逐孤光
懸飛竟不下亂起未成行
刷羽同搖漾一舉還故鄉

同昌叔賦鴈奴

王介甫

鴈鴈無定棲隨陽以南北
嗟嘆此爲奴至性能
懇惻人將伺其殆奴輒告之
亟舉羣寤而飛雖巧無所得
夜或以火取奴鳴火因匿
頻驚莫我捕顧謂奴不直
嗷嗷身百憂泯泯衆一息相隨
入矰繳豈不聽者惑偷安與受給
自古有亡國

君看鴈奴篇禍福甚明白

鳴鴈

韓愈

嗷嗷鳴鴈鳴且飛窮秋南去春北歸去寒就暖
識所處天長地久棲息稀風霜酸苦稻粱微羽
毛摧落身不肥徘徊反顧羣侶違哀鳴欲下洲
渚非江南水濶朔雲多草長沙飲無網羅閑飛
靜集鳴相和違憂懷惠性匪他凌風一舉君謂
何

律詩

孤鴈

杜甫

孤鴈不飲啄飛鳴聲念羣誰憐一片影相失萬
重雲望盡似猶見哀多如更聞野鴉無意緒啼
噪自紛紛

鴈

歐陽永叔

來時沙磧已冰霜飛過江南木葉黃水濶天低
雲暗澹朔風吹起自成行

早鴈

杜牧

金河秋半虜弦開雲上驚飛四散哀仙掌月明
孤影過長門燈暗幾聲來雖隨胡馬翩翩去豈
逐春風一一迴莫厭瀟湘少人處水多菰米岸

莓苔

鴈

鄭谷

八月悲風九月霜
蓼花紅澹葦條黃
石頭城下波搖影
星子灣西雲間行
驚起漁家吹短笛
失羣征戍鎖殘陽
故鄉聞爾亦惆悵
何況扁舟非故鄉

鴛鴦

鴈鵝附

羣書要語

鴛鴦水鳥鳧類雌雄未嘗相離入
得其一則一者相思死故謂之匹

鳥古今注

鴛鴦在梁戢其左翼止則相偶飛

則成雙詩鴛鴦于飛畢之羅之詩鴛鴦兮嚶嚶

楚詞勝林鳥之同心邁池魚之比目魂上相思

之樹文生新錦之機梁元帝賦

詩句客從遠方來遺我一端綺文彩雙鴛鴦裁

為合歡被古樂府江檻俯鴛鴦杜驚起鴛鴦豈

無恨一雙飛去却回頭杜牧

鴈鵝水鳥毛有五采臨海異物志

詩句一雙鴈鵝對沉浮

古今事實

瓦化鴛鴦

魏文帝問周宣曰吾夢殿屋兩瓦墜地化為鴛鴦何也宣對曰後宮當有暴死者帝曰吾詐卿耳宣曰夫夢者意耳苟以形言便占吉凶言未卒黃門令奏宮人相殺

人化鴛鴦

大夫韓朋一憑一作其妻美好康王奪之朋怨王囚之朋遂自殺妻乃陰腐其衣王與之登臺自投臺下左右捉衣衣不勝手遺書于帶曰願以屍還韓氏而合葬王怒令埋之兩塚相望經宿忽見有梓木生二塚之上根交於下枝連於上又有鳥如鴛鴦常棲其樹朝暮悲鳴南人謂此禽即韓朋夫婦之精魄搜神記

鸕鶿呈祥係鸕鶿

河南府尹闕前臨大溪每僚佐有入臺則水中先有小灘漲出石礫金澄澈可愛牛僧孺為縣尉一旦忽報灘出翌日宰邑與同僚列筵於亭上觀之有老吏云此必分司御史若是西臺灘上當有鸕鶿一雙立前後以此為則僧孺潛揣縣僚無出已者因舉杯曰既能有灘何惜一雙

史劇談錄
鷓鴣宴未終俄有鷓鴣飛下不旬日拜西臺御

古今文集

古詩

鴛鴦篇

陳子昂

飛飛鴛鴦鳥舉翮相蔽虧俱來綠潭裏共向白
雲涯音容相眷戀羽翮兩逶迤蘋萍戲春渚霰
露繞寒池浦沙連岸淨汀樹拂潭垂年年此遊
既歲歲來追隨鳳凰起丹穴獨向梧桐枝鴻鴈
來紫塞空憶稻梁施鳥啼倦依託鶴鳴傷別離

豈若此雙禽翻飛不異林刷羽清江浦交頸紫
山岑文章負奇色和鳴多好音聞有鴛鴦綺復
有鴛鴦衾特爲美人贈勗此故交心

鴛鴦篇

李德裕

君不見昔時同心人化作鴛鴦鳥和鳴一夕不
暫離交頸千年尚爲少二月草菲菲山櫻花未
稀金塘風日好何處不相依既逢解佩游女更
值凌波宓妃精光搖翠蓋麗色映珠璣雙影相
伴雙心莫違淹留碧沙上蕩漾洗紅衣春光兮
宛轉嬉遊兮未反宿莫近天泉池飛莫近長洲

苑爾願歡愛不相忘須去人間羅網遠南有瀟
湘洲且爲千里遊洞庭無苦寒沅江多碧流昔
爲薄命妾無日不含愁今爲水中鳥鵠鴝自相
求洛陽女兒在青閣二月羅衣輕更薄金泥文
彩未足珍畫作鴛鴦始堪著亦有少婦破瓜年
春閨無畔獨嬋娟夜夜學織連枝錦織作鴛鴦
人共憐悠悠湘水濱清淺漾初蘋菖花發艷無
人識江柳逶迤空自春唯憐獨鶴倚琴曲更念
孤鸞隱鏡塵願作鴛鴦被長覆有情人

律詩

鴛鴦

吳融

翠翹紅頸覆金衣灘上雙雙去又歸長短死生
無兩處可憐黃鵠愛分飛

鴛鴦

曹組 宋百家

蘋洲花嶼接江湖頭白成雙得自如春晚有時
描一對日長鋪盡繡工夫

鴛鴦

崔珏

翠鬢紅毛舞落暉水禽情似此禽稀暫分煙島
猶回首祇過寒塘亦並飛映霧乍迷金殿瓦逐
梭齊上玉人機採蓮無限蘭橈女笑拍中流候

爾歸

鴛鴦

皮日休

雙絲絹上為新樣連理枝頭是故園翠浪萬回
同過影玉沙千處共棲痕若非足恨佳人魄即
是多情年少魂應念孤飛爭忍宿蘆花蕭颯雨
昏昏

鈿鏡雕鏤費深功舞妓衣邊繡莫窮無日不來
湘渚上有時還在鏡湖中煙濃共拂芭蕉雨浪
細雙遊菡萏風應笑豪家鸚鵡畔年年徒被鎖
金籠

鴛鴦

盧弼

雙浮雙浴傍苔磯蓼浦蘭皋繡帳幃長羨鷺鷥
能潔白不隨鷓鴣鬪毛衣霞侵綠渚香衾暖樓
倚青雲殿瓦飛應笑隨陽沙漠鴈洞庭煙暖又
思歸

律詩 係鷓鴣

鷓鴣

杜甫

故使籠寬織須知動損毛青雲莫惆悵失水任
呼號六翮曾經剪孤飛卒未高且無鷹隼意留
滯莫辭勞

鷗 鷺附

羣書要語

鷺鷥也名水鴉 倉頡解詁 江鷗一

名海鷗在漲海中隨潮上下常以

三月風至乃還洲嶼頗知風雲若羣飛至岸必

風南越志

詩句 泛渚白鷗輕 遠鷗浮水靜 江浦寒鷗

戲 野鷗浮白浪 鷗邊水葉開 鷗泛已春

聲 春鷗懶避船 白鷗浮浩蕩萬里誰能馴

並杜心靜海鷗知 李白相親相近水中鷗杜惟

有白鷗盟未寒 江南野水碧於天中有白鷗

閑似我 並山谷舍南舍北皆春水但見羣鷗日

日來杜

鷺 水鳥毛白而潔故謂之白鳥齊魯之間謂之

春鋤青脚高尺餘解指尾喙長三寸許頂上有

毛十數枝絍絍然 詩疏 一名屬玉似鵝鵠 三輔

黃圖 振鷺于飛于彼西雝 周頌 振振鷺 同上

詩句 鈎簾宿鷺起 沙頭宿鷺連拳靜 又如

雪點青山雲 並杜屬玉飛來水滿塘 蘇養直水

遠山長雙屬玉身閑心苦一春鋤 山谷

古今事實

海翁狎鷗

海上之人好鷗者每旦之海上從鷗鳥遊鷗鳥之至者百數而不止其父曰吾聞鷗鳥皆從汝好取來吾玩之明日之海上鷗鳥舞而不下

鷺羽扇 係鷺

張融年弱冠同郡道士陸脩靜以白鷺羽扇遺之曰此異物奉異人

南史

古今文集

古詩

白鷗

王介甫

江鷗好羽毛玉雪無塵垢
滅沒波浪間生涯亦何有
雄雌屢驚矯機弋常紛糾
顧我獨無心相隨如得友
飄然紛華地此物乖隔久
白髮望東南春江綠如酒

律詩

鷗

杜甫

江浦寒鷗戲無他亦自饒
却思翻玉羽隨意點春苗
雪暗還須落風生一任飄
幾羣滄海上清影日蕭蕭

題韓魏公狎鷗亭 歐陽永叔

險夷一節如金石勲德俱高映古今豈止忘機鷗鳥信陶鈞萬物本無心

魏公得詩喜曰余在中書進退升黜未嘗置心於其間永叔可謂知我 古今詩話

古詩 以下係鷺

白鷺兒 劉禹錫

白鷺兒最高格毛衣新成雪不敵衆禽喧呼獨疑寂孤眠芊芊草久立潺潺石前山正無雲飛去入遙碧

律詩

鷺鷥 張祜

深窺思不窮揭趾淺沙中一點山光淨孤飛潭影空暗棲松葉露雙下蓼花風好是滄波侶垂絲意亦同

謝紫微以畫鷺二軸為寄

梅聖俞

白鷺畫雙素粉毫幽趣多翹沙依折葦刷羽對衰荷浦思懸秋碧江清憶釣簑因君遠相寄時詠到滄波

鷺鷥

鄭谷

閑立春塘煙澹澹靜眠寒葦雨颼颼
漁翁歸後汀沙晚飛下灘頭更自幽

鷺鷥

杜牧

霜衣雪髮青玉觜羣捕魚兒溪影中
驚飛遠映碧山去一樹梨花落晚風

鷺鷥

羅隱

斜陽淡淡柳陰陰風裊寒絲映水深
不要向人誇潔白也知常有羨魚心

鷺鷥

歐陽永叔

風格孤高塵外物性清閑淡水邊
身盡日獨行溪淺處青苔白石見纖鱗

雙鷺

陶雍

雙鷺應憐水滿池風飄不動頂垂絲
立當青草人先見行傍白蓮魚未知
一足獨拳寒雨裏數聲相伴早秋時
林塘得爾須增價况是詩家物色宜

鷓鴣

鷓鴣不生外而孕雛於地澤間異

羣書要語

物志 倭國水多陸少以小環挂鷓

鷓項令入水捕魚取以充食 隋書

詩句 鷓鷯西日照曬翅滿漁梁 杜

古今事實

白鷓鷯

唐貞元十三年上以時雨未降幸興慶宮行雩

祀忽有白鷓鷯羣類翼從咸驚異之果大雨滂

沱 唐紀

古今文集

律詩

鷓鷯

杜荀鶴

一般毛羽結羣飛兩岸煙汀好景時深水有魚
街得出看來却是鷺鷥飢

新編古今事文類聚卷之四十六

後集

新編古今事文類聚卷之四十七

後集

建安祝穆和父編

羽蟲部

我鵝

羣書要語

鵝一名舒鴈江東人謂之鳴爾雅

駕鵝野鵝也廣志鵝善鬪好啖蛇

古今注

舒鴈翠

注

翠尾

內則

鵝性頑而傲

齊卞

彬禽獸訣錄

詩句

鵝兒黃似酒對酒愛新鵝杜不教鵝鴨惱

比鄰 杜

古今事實

食鵝出哇

陳仲子居於陵有饋其兄生鵝者已嘖盛曰惡用是鵝鵝鵝聲者為哉他日毋殺鵝食之其兄曰是鵝鵝之肉也出而哇之

寫經博鵝

晉王羲之性愛鵝會稽有姥養一鵝善鳴求市未能得遂携親友就觀姥聞羲之將至烹以待之羲之嘆惜彌日又山陰有道士好養鵝羲之往觀焉意甚悅固求市之道士云為寫道德經當舉羣相贈耳羲之欣然寫畢籠鵝而去

求子鵝炙

劉毅家在京口酷貧嘗與鄉曲士大夫往東堂共射時庾悅為司徒右長史要府僚佐出東堂毅已先至遣與悅相聞曰身並貧躋營一遊甚難君如意人無處不可為適豈能以堂見讓悅不答時衆人並避惟毅留射如故悅厨饌甚盛不以及毅毅既不去悅甚不歡毅又相聞曰身今未得子鵝豈能以殘炙見惠悅又不答及毅

貴奏解悅都督將軍官深相挫辱悅不得志疽發背少日而卒

鵝聽講經

淨影寺沙門慧遠講經初在鄉養一鵝常隨遠聽經及遠入京留在寺晝夜鳴噪不止僧徒送入京至此寺大門放之自然知遠房便入馴狎每聞講鍾即入堂伏聽若聞泛說他事則鳴翔而出如是六年忽哀叫庭宇不肯入堂二旬而遠卒寺內有遠碑亦述其事

兩京記

隻鵝送別

何遠爲永康令人甚稱之太守王彬巡屬縣諸縣皆盛供帳以待焉至永康遠獨設糗水而已彬去遠送之拜斗酒隻鵝而別彬戲曰卿禮有過陸納將不爲古人所笑乎

南史

繫鵝求妾

庾信自建康遁歸江陵湘東王因賜妾徐氏妾與任揆私通揆欲求之無致言者信庭前有一蒼鵝乃繫書于鵝頸信視之乃揆啓遂題紙尾曰畜生乞汝

三國典畧

食鵝知色

符即食鵝炙知黑白之處人不信既而試之果然秦記

啖鵝草詔

齊高帝引江淹入中書省先賜酒食淹素能飲啖食鵝炙垂盡飲酒數升文詔亦辦

木鵝達表

唐高祖義兵至河東隋將堯君素城守時圍甚急君素乃爲木鵝置表於頸具論事勢浮之黃河下河陽守者得之達於東都越王侗見而嘆息

龍城驚鵝

唐元和間李愬襲蔡州兵至懸孤城夜半雪甚城旁有鵝鴨池愬令驚擊之以雜其聲

好鬪鵝

唐令孜傳僖宗好鬪鵝數幸六王宅興慶池與諸王鬪鵝一鵝至十萬錢

鵝能警盜

東坡云鵝能警盜亦能却蛇且又有祈雨厄悲夫志林

古今文集

古詩

題畫鵝

黃魯直

駕鵝引頸回似我胸中字右軍數能來不為口腹事

律詩

得房公池鵝

杜甫

房相西亭鵝一羣眠沙泛浦白於雲鳳凰池上應迴首為報籠鵝王右軍

鵝

李商隱

眠沙卧水白成羣曲岸斜陽極浦雲那得將心

憐孔翠羈雌長共故雄分

吳執中有兩鵝為余烹之戲贈

黃魯直

學書池上一雙鵝宛頸相追筆意多皆為涪翁赴湯鼎主人言汝不能歌

世以婢子為鴨謂吳貴鴨而賤鵝也

鴨

鳧附

羣書要語

鳧鵞鴨也廣雅鴨一名舒鳧爾雅
鵞野鳧也說文家曰鳧野曰鴨李

巡云雞伏鴨卵雛成入水雞母隨岸呼之雛出而不隨母鴨雞異類能相隨也風俗通喙喋爭食雛褫帶雛李邕聞鴨賦鴨足何以取雞足何以斲傳子

詩句我衰寄江湖老伴雞鵝鴨坡願為穿雲鶻

笑作將雛鴨坡拊掌動鄰里遶村捉鵝鴨坡曲

池眠乳鴨李賀

鳥春草雞翹鳥翁濯顏**田**鳥水鳥翁頸上有毛

史游急就章鳥得水藻言喜悅也後漢劉陶議

注鳥脛雖短續之則悲莊子鳥鷺在沙大雅寧

與騏驥抗軛乎將與雞鶩爭食乎寧昂昂若干

里之駒乎寧泛泛若水中之鳥與波上下而以

全吾軀乎漁父雙鳥飛不為加少解嘲鳥鴈常

在海邊沙上食沙石皆消爛唯食海蛤不消隨

其糞出古今注

詩句二鳥俱北飛一鳥獨南翔李陵浴鳥翻雪

羽杜牧沙上鳥雛傍母眠杜相趨鳥鷗入漿牙

杜江心嘓嘓鳥雛鳴張籍鳥雛亂散掉漚發杜

古今事實

作闔鴨欄

建昌侯孫慮於堂前作鬪鴨欄頗施小巧陸遜
正色曰君侯宜勤覽經典用此何為慮即毀之
吳志

斃鴨償金

陸龜蒙居震澤之南巨積莊有鬪鴨一欄有驛
使過挾彈斃其尤者龜蒙手一表本云此鴨能
作人語待附蘇州上進使者斃之柰何使人恐
酬以橐中金俟其稍悅方倩語之猶曰能呼其
名使人僨且笑拂袖上馬復召之還其金曰吾
戲耳

雙鳥飛鳧

王喬為葉令喬有神術每月朔旦常自縣詣臺
朝帝怪其來數而不見車騎密令太史伺望之
言其臨至輒有雙鳥從東南飛來於是候鳥至
舉羅張之但得一雙履乃詔尚方訖視則曰所
賜尚書官屬履

辨海鳧毛

人有得鳧毛長三丈以示張華華見曰不然此
謂海鳧毛也出則天下亂

博物志

古今文集

古詩

水鴨

司馬君實

襜褕出短蒲
菹鵝浴清水
物忌太鮮明
何妨染泥滓

莫打鴨

梅聖俞

事見妓門

莫打鴨打鴨
驚鴛鴦鴛鴦
新向西池落
不比孤洲老
禿鶻禿鶻
尚欲遠歸去
何況鴛鴦
羽翼長

詩話

評睡鴨詩

徐陵鴛鴦賦云
山雞映水那相得
孤鸞照影不成
雙天下真成長會
合無勝比翼兩鴛鴦
黃魯直題畫睡鴨曰
山雞照影空自愛
孤鸞舞鏡不作
雙天下真成長會
合兩鳧相倚
睡秋江全用徐語
點化之末句尤精工
容齋隨筆

律詩

係鳧

鳧

李嶠

颯沓睢陽涖
浮遊漢渚隈
錢飛出井見
鶴引入琴哀
李陵賦詩罷
王喬曳舄來
何當歸太液
翔集動成雷

精衛

羣書要語

有鳥如烏文首白喙赤足名曰精衛博物志

古今事實

精衛填海

昔炎帝女溺死東海中化為精衛每銜西山木石以填東海怨溺死也 述異記

古今文集

古詩

精衛詞

王建

精衛誰教爾填海海邊石子青磊磊但得海水作枯池海中魚龍何所為口穿豈為空銜石山中草木無全枝朝在樹頭暮海裏飛多羽折時墮水高山未盡海未平願我身死子還生

伯勞

梟附

羣書要語

鵙伯勞也爾雅一名博勞一名伯趙廣雅仲夏之月鵙始鳴月令七

月鳴鵙 幽風

詩句 東飛伯勞西飛燕 古樂府 南窻北窻桂月

光 東飛伯勞歌

梟不孝鳥也至日捕梟磔之 說文 梟子大食其

母 淮南子注 北方梟人家以為怪共惡之南中

晝夜飛鳴與烏鵲無異桂林人羅取生鬻之家

家養使捕鼠以為勝狸 嶺表錄異

古今事實

伯勞集李

東方朔與弟子偕行渴令弟子扣道邊家求飲不知姓名主人開門不與須臾見伯勞飛集主人

人門中李樹上朔謂弟子曰此主人姓李名伯

勞爾但呼李伯勞果有李伯應即入取飲 別傳

請禳梟怪 以下係梟

齊景公為露寢之臺成有梟鳴甚惡之栢常騫曰請為禳之夜用事明日問曰今日聞梟鳴乎公曰一鳴而不復聞使人往視之梟當陞布翼伏地而死 說苑

諱言不孝

男子畢康殺其母詔焚燒其屍暴其罪於天下余上章言宣帝時公卿朝會丞相語次日聞梟

生子長且食其母寧然有賢者應曰但聞烏子
反哺耳丞相大慙君子之於鳥獸尚爲之諱况
人乎桓譚新論

梟鳴戰勝

晉張重華爲石季龍所攻重華使謝艾爲中堅
將軍引師出振武夜有二梟鳴牙中尅敵之兆
於是進戰大破之

梟鳴改官

有梟鳴于張率更庭樹其妻以爲不祥連唾之
張問之曰急洒掃吾當改官言未畢賀者已在

門唐書

古今文集

雜著

惡鳥論 伯勞 梟

魏陳王曹植

國人有以伯勞生獻者王召見之侍臣曰世間
惡伯勞之聲敢問何謂也王曰昔尹吉甫用後
妻之讒殺孝子伯竒吉甫後悟追傷伯竒出游
于田見鳥鳴于桑其聲噉然吉甫動心曰伯竒
乎鳥乃撫翼其音尤切吉甫乃顧曰伯勞乎是
吾子栖吾輿非吾子飛勿居鳥尋聲而栖其蓋

歸入門集于井幹之上向室而號吉甫命後妻
載弩射之遂射殺後妻以謝之故俗惡伯勞言
所鳴之家必有凶也梟鴟之鳴弗可更者天性
然也昔荆之梟將巢於吳鳩遇之曰何去荆而
巢吳乎梟曰荆人惡予之聲鳩曰子如不能革
子之音則吳楚之民不易情也為子計者若宛
頸戢翼終身勿復鳴也昔議朝會者有人問曰
寧有聞梟食其母有答之者嘗聞烏反哺未聞
梟食其母聞者慙惡不善也得嬉者莫不馴而
放之為利人也得蚤者莫不靡之齒牙為害身
也鳥獸昆蟲猶以名聲見異况夫吉士之與凶
人乎

鴟鴞

鴟 鴞 鴞 鴞
鬼車並同 訓狐附 車載板

羣書要語

鴟鴞惡鳥也一名鴞一名鴞鴞說
文鴞入人家凶賈誼所賦鴞是也

其肉甚美可為羹臠又可炙詩鴞鴞人亦尚
之內則翻彼飛鴞集于泮林食我桑椹懷我好
音魯頌若簇氏掌覆天鳥之巢周禮庭氏掌射
國中之天鳥同上鴟鴞嗜鼠莊子鴞鴞即鴟也

一名姑獲爲鬪音可以聚諸鳥鵙鵙晝日目無所見夜則飛撮蚊蚋鵙鵙乃鬼車之屬也皆夜飛晝藏或好拾人爪甲則知吉凶凶者輒鳴於屋上知其將有咎耳故人除指甲埋之戶內蓋忌此也亦名夜遊女好與嬰兒作祟故嬰兒之衣不可置星露下畏其祟耳又名鬼車春夏之交稍遇陰晦則飛鳴而過嶺外尤多愛入人家鑠人菟氣或云常滴血血滴之家則有凶咎太平廣記鵙鵙一名忌欺白日不見人夜能拾蚤

蟲雜志

鬼車正月七日多鬼車鳥度家家槌門打戶換狗耳滅燈燭禳之荆楚歲時記

古今事實

鴟鴞毀室

鴟鴞周公救亂也成王未知周公之志公乃爲詩以遺王名之曰鴟鴞焉鴟鴞鴟鴞既取我子母毀我室恩斯勤斯鬻子之閔斯

歌鴟寓諷

陳辯女者陳國采桑之女也晉大夫解居甫使於宋道過陳遇采桑之女而戲之曰女爲我歌

吾將舍女乃為歌曰墓門有棘斧以斯之夫也
不良國人知之知而不已誰昔然矣又曰為我
歌其二女曰墓門有梅有鴉萃止夫也不良歌
以訊之訊予不顧顛倒思予大夫曰其梅則存
其鴉安在女曰陳小國也攝乎大國之間因之
以飢饉加之以師旅其人且亡而况鴉乎大夫
乃服而釋之列女傳

好鴉炙

王羲之好鴉炙

使捕鵒鵒係鵒鵒

侯景入臺城在昭陽殿廊下居處常有鵒鵒鳥
嗚呼景惡之使人窮山野捕焉南史

符奏鳥死

尹軌字公度人有怪鳥鳴其屋上者以語公度
公度為一奏符著鳥鳴處其夕鳥伏符下神仙傳

古今文集

古詩

病鴉

韓愈

屋東惡水溝有鴉墮鳴悲青泥揜兩翅拍拍不
得離羣童叫相召瓦礫爭先之計較生平事殺

却理亦宜奪攘不愧恥飽滿盤天嬉晴日占光
景高風送追隨擬凌鸞鳳羣肯顧鴻鵠卑今者
運命窮遭逢巧丸兒中汝要害處汝能不得施
於吾乃何有不忍乘其危救汝將死命浴以清
水池朝餐輟魚肉暝宿防狐狸自知無以致蒙
德久猶疑飽入深竹叢飢來傍階基諒無責報
心因以聽所爲昨日有氣力飛跳弄藩籬今晨
忽徑去曾不報我知僥倖非汝福天衢汝休窺
京城事彈射豎子豈易欺勿諱泥坑辱泥坑乃
良規

律詩

鴟

王介甫

喻小人不足道又有附之以顯者

依倚秋風氣象豪似欺黃雀在蓬蒿不知羽翼
青冥上腐鼠相隨勢亦高

雜著 係鵬

鵬鳥賦

賈誼

誼爲長沙王傅三年有鵬鳥飛入誼舍止於坐
隅似鴟不祥鳥也誼旣以謫居長沙長沙卑濕
誼自傷悼以爲壽不得長乃爲賦以自廣其辭

曰

單闕之歲四月孟夏庚子日斜鵬集余舍止於
坐隅貌甚閑暇異物來崒私怪其故發書占之
讖言其度曰野鳥入室主人將去問於子鵬余
去何之吉虜告我凶言其災淹速之度語余其
期鵬乃太息舉首奮翼口不能言請對以意萬
物變化固亡休息幹流而遷或推而還形氣轉
續變化而嬗沕穆無間胡可勝言禍兮福所倚
福兮禍所伏憂喜聚門吉凶同域彼吳彊大夫
差以敗越棲會稽勾踐霸世斯遊遂成卒被五
刑傳說胥靡乃相武丁夫禍之與福何異糾纏
命不可測孰知其極水激則旱矢激則遠萬物
回薄震盪相轉雲蒸雨降糾錯相紛大鈞播物
塊圯無垠天不可預慮道不可與謀遲速有命
烏識其時且夫天地爲爐造化爲工陰陽爲炭
萬物爲銅合散消息安有常則千變萬化未始
有極忽然爲人何足控揣化爲異物又何足患
小智自私賤彼貴我達人犬觀物無不可貪夫
徇財列士狗名夸者死權品庶每生怵迫之徒
或趨西東大人不曲億變齊同愚士繫俗僂若

囚拘至人遺物獨與道俱衆人惑惑好惡積意
真人恬漠獨與道息釋智遺形超然自喪寥廓
忽荒與道翱翔乘流則逝得坎則止縱軀委命
不私與已其生兮若浮其死兮若休澹辱若深
淵之靜泛辱若不繫之舟不以生故自寶養空
而游德人無累知命不憂細故芥蒂何足以疑
古詩係鬼車

車載板

即鬼車不祥鳥也

王介甫

荒哉我中國珍菓所不產朝暮惟有鳥自呼車
載板楚人聞此聲莫有笑而莞而我更歌呼與
之相往返視遇若搏黍好音而覘睨壞壞生死
夢久知無可揀物弊則歸土吾歸其不晚歸歟
汝隨我可相蒿里挽

鳥有車載板朝暮常一至世傳鵲似鴉而此與
鴉似唯能預人死以有此名字疑即賈長沙當
時所遭值洛陽多少年擾擾經世意粗聞方外
語便釋形骸累吾衰久捐書放浪無復事尚自
不見我安知汝爲異憐汝好毛羽言音亦清麗
胡爲太多知不默而見忌楚人旣憎汝彈射將

汝利且長隨我遊吾不汝羹哉

鬼車

梅聖俞

嘉祐六年秋九月二十有八日天愁無光月不出浮雲蔽天衆星沒舉手向空如抹漆天昏地黑有一物不見其形但聞其聲其初切切淒淒或高或低乍似玉女調玉笙衆管參差而不齊既而伊伊啾啾若軋若抽又如百兩江州車回輪轉軸聲啞嘔鳴機夜織錦江上羣鴈驚起蘆花洲吾謂此何聲初莫窮端由老婢撲燈呼兒曹云此怪鳥無匹壽其名爲鬼車夜載百鬼凌

空遊其聲雖小身甚大翅如車輪排十頭凡鳥有一口其鳴已啾啾此鳥十頭有十口十口插一舌連一喉一口出一聲千聲百響更相酬昔時周公居東周厭聞此鳥憎若_解夜呼庭氏率其屬彎弧俾逐出九州射之三發不能中天遣天狗從空投自從狗啣一齒落斷頭至今清血流邇來相距三千秋晝藏夜出如鴝鷓每逢陰黑天外過乍見火光驚輒墮有時餘血下點汚_烏所遭之家家必破我聞此語驚且疑反祝疾飛無我禍我思天地何茫茫百物巨細理莫

詳吉凶在人不在物一蛇兩頭反為祥却思老
婢炷燈火卷簾開戶清華堂須臾雲散眾星出
夜靜皎月流清光

古詩係訓狐

射訓狐

韓愈

有鳥夜飛名訓狐矜凶挾狡誇自呼乘時陰黑
止我屋聲勢慷慨非常竈安然大啖誰畏忌造
作百怪非無須聚鬼徵妖自朋扇擺掉拱角頰
暨塗慈母抱兒怕入席那暇更護雞窠離我念
乾坤德泰太卯此惡物常勤渠縱之豈即處有
害斗柄行指西南隅誰謂停姦計尤劇意欲唐
突羲和鳥侵更歷漏意彌厲何由僥倖休須臾
咨余往射豈得已候汝兩眼張盱眙梟鷲墮梁
蛇走竇一夫斬頸羣離枯

眾禽

羣書要語

希有鳥

崑崙山有鳥名希有張左

翼覆東王公右翼覆西王母神異經

比翼鳥

南方有鳥不比不飛其名兼兼一目一

翼相得乃飛

爾雅

木客鳥 大如鵲數千百頭為羣飛有度不與衆

鳥相廁 異物志

鵜鴒 一名鵜澤 爾雅 水鳥也大喙長尺餘頷下

大如數斗囊若小水有魚能抑水滿其頷含水
竭盡魚在地乃共食之故曰淘河 詩疏

思歸鳥 狀如鳩而慘色三月則鳴其音云不如

歸去 陶岳零陵記

古今事實

青鳥先集

武帝七月七日於承華殿齋忽有青鳥從西方

來集殿前上問東方朔朔曰此西王母欲來也

有頃王母至 漢武故事

鸛雀銜鱸

後漢楊震字伯起年五十始應州郡辟衆人謂
之晚暮後有鸛雀銜二鱸魚飛集講堂前都講
取魚進曰蛇鱸者卿大夫服之象也數三者法
三台也先生自此升矣

古今文集

古詩

鷓鴣吟

劉禹錫

朝陽有飛鳳不聞千萬祀
鷓鴣催衆芳畏聞先
入耳秋風白露晞從是爾啼時
如何上春日唧唧滿庭飛

四禽言

梅堯臣

泥滑滑苦竹岡雨蕭蕭
馬上郎馬蹄凌競雨又
急此鳥爲君應斷腸

婆餅焦兒不食爾父向何之
爾母山頭化爲石
山頭化石可柰何遂作微禽啼不息

提葫蘆沽美酒風爲賓樹爲友
山花撩亂目前
開勸爾今朝千萬壽

不如歸去春山云暮萬木兮
天蜀天兮何處
人言有翼可歸飛安用空啼向高樹

五禽言

蘇子瞻

使君向蘄州更唱蘄州鬼
我不識使君寧知使
君死人生作鬼會不免使君以老知何晚

王元之自黃移蘄州聞啼鳥問其名或對
曰此名蘄州鬼元之大惡之果卒於蘄

南山昨夜雨西溪不可渡
溪邊布穀思勸我脫
布袴不辭脫袴溪水寒水中照見催租癢
去年麥不熟挾彈規我肉今年麥上場處處有

殘粟豐年無象何處尋聽取林間快活吟
力作力作蠶絲一百箔墮上麥頭昂林間桑子
落願儂一箔千兩絲縲絲得蛹飼爾雛
姑惡姑惡姑不惡妾命薄君不見東海孝婦死
作三年乾不如漢龐姑去却復還

戲和答禽語

黃魯直

南村北村雨一犁新婦餉姑翁哺兒田中啼鳥
自四時催人脫袴著新衣著新替舊亦不惡去
年租重無袴著

五禽言和王仲衡尚書 朱元晦

提葫蘆沽美酒春風浩蕩吹花柳不用沙頭雙
玉瓶鳥歌蝶舞為君壽祇今一醉是君恩昨日
之愁愁殺人

不如歸去孤城越絕三春暮故山只在白雲間
望極雲深不知處不如歸去不如歸去千仞岡頭
一振衣

泥滑滑泥滑滑秦望雲荒鏡湖闊綠秧刺水水
拍堤牙旗畫舸凌風發使君行樂三江頭泥滑
水深君莫憂

脫袴脫袴桑葉陰陰墻下路回頭忽憶舍中妻

去年已逐他人去舊袴脫了却不辭新袴知教
阿誰做
麥熟吟去年種麥有德音秖今種熟誰快活種
者已卧官墻陰仁公有政惠存歿旨使催租更
隳突

次向和卿韻

黃魯直

雪泥滑滑到山郭提壺歡沽亦不惡林中解道
不如歸家人應念思歸樂
律詩

和思歸樂

白居易

山中不栖鳥夜半聲嚶嚶似道思歸樂行人掩
泣聽

絕句

韓愈

喚起窻全曙催歸日未西無心花裏鳥更與盡
情啼

畫眉鳥

歐陽永叔

百轉千聲隨意移山花紅紫樹高低始知鎖向
金籠聽不及林間自在啼

聞竹雞

楊廷秀


山行三日厭泥行幸自今晨得一晴又聽數聲

泥滑滑情知浪語也心驚

白頭公


魏野

有何辛苦有何愁箇箇林間盡白頭細葉累巢
花影暖微蟲共食竹陰秋清音豈許黃鶯伏素
羽曾教白鷺羞唯爾鬢毛應似我相逢不用話
因由



新編古今事文類聚卷之四十七

後集




事文類聚後集

四十八之五十一

廿二

24
2
52



館書圖京東			
三	元	別	類
冊	號	架	函
			漢書門類

不詳世

新編古今事文類聚卷之四十八

後集

建安祝

穆和父編

○蟲牙部

蜜蜂

衆蜂附

淺草文庫

羣書要語

有蜜謂之壺蜂 方言玄蜂若壺 楚

辭蜂有兩衙應潮 裨雅藹藹華華

雖無官職一日兩衙 見覆射繁布金房疊構玉

宇咀嚼華滋釀以爲蜜散似甘露凝如割肪冰

鮮玉潤髓滑蘭香 郭璞賦 凡蜂作蜜皆須人小

便以釀諸花乃得成熟狀似作飴須蘖也本草

詩句花暖蜜蜂喧 天寒割蜜脾 柱穿蜂溜

蜜並杜可憐採花蜂清蜜寄兩股坡蜜蜂為主

各磨牙咬盡村中萬木花孟郊花底山蜂遠趁

人杜遊蜂多思正經營韓黃蜂衙退海潮上錢

昭度 稚蜂趁衙供蜜課山谷

衆蜂土蜂大在土中作房子可啖木蜂小在樹

上作房子爾雅莫予芥蜂自求辛螫周頌蜂蠆

有毒左傳蜂蠆垂芒孝經援神契 蜂有攻寡之

義抱朴子猛獸在田荷戈而出凡人能之蜂蠆

作於懷袖勇夫為之驚駭晉鄒湛傳人能搏猛

獸而不能無變色於蜂蠆坡文

古今事實
收養蜜蜂

遠方諸山郡僻處出蜜蠟所著皆絕岩石壁非

攀緣所及唯於山頂以檻輦自懸挂下遂乃得

取其處人家有養蜂者其法以木為器或十斛

五斛開小孔令纜容蜂出入以密蠟塗器內令

遍安著簷前或庭下春月此蜂分窠時來過人

家園垣者捕取得三兩頭便內著器中數宿出

蜂飛尋將伴來還或多或少經日漸益不可復
數遂停住往來器中所滋長甚衆

博物志

稷蜂不藝以下係衆蜂

稷蜂不藝社鼠不燠非以稷蜂社鼠之神也其
所託者然也

韓詩外傳

假蜂進讒見後母門

蜂集不祥

豫章嚴豐字孟侯爲郡主簿太守賈萌舉兵欲
誅王莽有飛蜂附萌車衡豐諫以爲不祥之徵
萌不從果見殺

謝承後漢書

仙翁吐蜂

葛仙翁與客對食客曰食畢當先作一奇戲食
未竟仙翁曰諸公得無欲見乎即吐口中飯盡
成飛蜂滿屋或集客身莫不震肅但自不螫人
耳良久仙翁乃張口見蜂皆飛還入口中成飯
食之別傳

蜂鑽窻紙

神瓚禪師見蜂子投窻紙來出師曰世界如許
廣濶不肯出鑽它故紙

傳燈錄

俗啖蜂兒

唐劉恂魯遊宣歙間見彼中人好食蜂兒狀如
蚕蛹而潔瑩白大蜂結房於山林間其大如巨
鍾其中不知幾百層村人採時須以草衣蔽身
以捍毒螫復以煙火逼散蜂母然後攀援崖樹
斷其根一房有蜂兒五斗或一石三分之一翅
足具矣即入鹽酪炒之曝乾以小紙囊貯之寄
入京洛以爲方物嶺表錄異

古文文集

雜著

記蜂

王元之

商於兔和寺多蜂寺僧爲予言之事甚具予因
問蜂之有王其狀何若曰其色青蒼差大于常
蜂耳問胡以服其衆曰王無毒不識其它問王
之所處曰窠之始營必造一臺其大如粟俗謂
之王臺王居其上且生子其中或三或五不常
其數王之子盡復爲王矣歲分其族而去山毗
患蜂之分也以棘刺闕于王臺則王之子盡死
而蜂不析矣又曰蜂之分也或團如罌或鋪如
扇擁其王而去王之所在蜂不敢螫失其王則
潰亂不可嚮迹凡取其蜜不可多多則蜂飢而

不蕃又不可少少則蜂情而不作予愛其王之
無毒似以德而王者又愛其王之子盡復爲王
似一姓一君上下有定分者也又愛其王之所
在蜂不敢螫似法令之明也又愛其取之得中
似什一而稅也至于刺王之臺使絕其息不仁
之甚矣故總而記云

古詩

採蠟一章

顧况

採蠟怨奢也荒岩之間有以續蒙其身腰藤造
險及有群蜂肆毒哀呼不應則上捨藤而下沈

壑

採採者蠟于泉石兮煌煌中堂列華燭兮新歌
善舞弦柱促兮荒岩之人自取其毒兮

蜜

楊廷秀

燕銜芹根泥蜂掇花上藥帶雨兩股飛所取日
能幾調和露與英凝甘滑於髓天寒百蟲蟄割
房霜在七燕已成雛歸蜂憂凍餒死乃見萬物
心多爲造化使

收蜜蜂

蘇子由

空中蜂隊如車輪中有王子蜂中尊分房減口

未有處野老解與蜂語言前人傳蜜延客住後
人秉艾催客奔布囊包裹鬧如市坐入竹屋新
且完小窻出入旋知路幽圃首夏花正繁相逢
處處命儔侶共入新宅長子孫今年活計知尚
淺蜜蠟未暇分主人明年少割助和藥慙愧野
老知利源

蜜酒歌并序

蘇子瞻

西蜀道士楊世昌善作蜜酒絕醇
釀余得其法作此歌遺之

真珠爲漿玉爲醴六月田夫汗流泚不如春甕
自生香蠟爲耕耘花作米一日小沸魚吐沫二
日眩轉清光活三日開甕香滿城快瀉銀餅不
須潑百錢一斗濃無聲甘露微濁醴醕清君不
見南國採花蜂似雨天教釀酒醉先生先生年
來窮到骨問人乞米何曾得世間萬事真悠悠
蜜蜂大勝監河侯

和子瞻蜜酒

蘇子由

蜂王舉家千萬口黃蠟爲糧蜜爲酒口街澗水
拾花鬚沮洳滿房何不有山中醉飽誰得知割
脾分蜜曾無遺調和知與酒同法試投麴蘖誠

相宜城中禁酒如禁盜三百青錢愁杜老先生
年來無俸錢一斗徑須囊一倒鋪糟不聽漁父
言煉蜜深愧仙人傳掉頭不問辟穀藥忍飢不
如長醉眠

蜂兒

楊廷秀

蜜蜂不食人間倉玉露為酒花為糧作密不忙
採花忙蜜成猶帶百花香蜜成萬蜂不敢嘗要
輸密國供蜂王蜂王未及享人已割蜜房老饕
吏來搜我室老蜂無味祇有滓平幼蜂初化未
成兒老饕火攻不知止既入我室取我子

螟蛉

螺贏附

羣書品語

螟蛉似步屈桑上小青蟲也詩疏
尺蠖又呼步屈方言

螺贏

蒲盧也

注

俗呼蠚蠚音咽蠚爾雅似蜂而

細腰詩疏

古今事實

羸祝螟蛉

螟蛉之子殖而逢螺贏祝之曰類我類我久則
肖之矣 楊子

政者蒲盧 係螺贏見官政門

古今文集

雜著

螟蛉賦

歐陽永叔

爰有桑虫實曰螟蛉與夫螺贏異類殊形負以
為子祝之以聲其子感之朝夕而成嗟夫人子
父母所生父祝之言子莫之聽父傳之業子莫
克成父沒母死身覆位傾嗚呼為人孰與虫靈
人不如虫曷以人稱

常觀螺贏所負不但螟蛉或取蟪子磔而
斃之因產一小卵於其上俟其卵化而成
形漸食所負之虫久乃寢大生翼飛去古
人精於物理類我之說或他有所據耶余
因編入此部聊記于此以俟博物君子考
焉

蝴蝶

羣書要語

蛺蝶一名野蛾一名風蝶江東謂
之捷末色白背青者是也其大如

蝙蝠或黑色或青班名曰鳳子一名鳳車一名

鬼車生江南橘樹間古今注橘之蠹為蝴蝶陸龜蒙蠹化篇

詩句 沙晚低風蝶 風蝶勤依槩 風輕粉蝶

喜並杜揚揚弄芳蝶 韓娟娟戲蝶過閑幔 留連戲蝶時時見 穿花蛺蝶深深見 並杜身似何郎全傳粉心同韓壽暗偷香謝無逸

古今事實

夢為蝴蝶

昔莊周夢為蝴蝶栩栩然蝴蝶不知周也俄然覺則遽遽然周也不知周之夢為蝴蝶蝴蝶之

為周周與蝴蝶必有分矣此謂物化莊子

蝴蝶輕薄

北齊魏牧嘗在洛京輕薄尤甚人號為驚蝴蝶翅有金眼

衛公得峽中蝴蝶翅闊四寸餘深褐色每翅上有二金眼雜俎

畫蝶圖

周昉有畫蝶圖一卷藝文志

古今文集

古詩

鬼蝶

蘇子瞻

雙眉卷鐵絲兩翅暈金碧初來花爭妍忽去鬼無迹

律詩

六言

黃魯直

蝴蝶雙飛得意偶然畢命網羅群蟻爭收墜翼策勲歸去南柯

山谷詩意謂二蘇而有譏焉詩雖小清婉而意足殆詩之法言也

蔡載集

蝶

李嶠

飛來繡戶陰穿過畫樓深重傳秦臺彩輕塗漢殿金相兼惟柳絮所得是花心可要凌孤客邀為子夜吟

蝴蝶

鄭谷

尋艷復尋香似閑還似忙暖煙尋蕙徑微雨宿花房書幌輕隨夢歌樓誤採粧王孫深屬意繡入舞衣裳

絕句

李義山

青陵臺畔日光斜萬古貞魂倚暮霞莫許韓憑見鴛鴦門為蛺蝶等閑飛上別枝花

韓漑

古今事實

寒蜚翔水

文子曰飛鳥反鄉兔走歸窟狐死首丘寒蜚也蜚
翔水各依所生

蜩笑鵬飛見鵬門

蟬名齊女

牛亨問董仲舒曰蟬名齊女何故答曰昔齊王
之后怨王而死屍變為蟬登庭樹嘒唳而鳴王
悔恨之故名齊女崔豹古今注

漢官金蟬

應邵漢官儀曰侍中金蟬左貂金取剛百煉不
耗蟬居高飲而口在腋下貂內勁而外温

塘娘捕蟬見黃雀門

蟬有五德

陸雲曰昔人稱雞有五德至於寒蟬才齊其美
而莫斯述夫頭上有綫則其文也含氣飲露則
其清也黍稷不享則其廉也處不巢居則其儉
也應候守節則其信也寒蟬賦序

飛蟬集冠

梁朱异爲通事舍人後除中書郎時秋日始拜
有飛蟬正集异冠上時咸謂蟬珥之兆

古今文集

雜著

蟬賦

魏曹植

惟夫蟬之清潔潛厥類於太陰在炎陽之仲夏
兮始游豫乎芳林實淡泊而寡慾兮獨怡樂而
長吟聲噉噉而彌厲兮似貞士而介心内含和
而弗食兮與衆物而無求棲喬枝而仰首兮漱
朝露之清流隱柔桑之稠葉兮快啁號以遁暑

苦黃雀之作害兮患螳螂之勁斧飄高翔而遠
託兮毒蛭蛛之網罟欲降身而卑竄兮懼草虫
之襲予免衆艱而弗獲兮遙遷集乎官宇依名
果之茂蔭兮託脩榦以靜處有翩翩之狡童兮
步容與於園囿體離朱之脫視兮姿才捷於猴
猿條罔葉而不挽兮樹無榦而不緣翳輕軀而
奮迅兮跪側足以自閑恐此身之驚駭兮精曾
睨而目連恠柔竿之冉冉兮還微粘而我纏欲
翻飛而逾滯兮知性命之長捐亂曰詩嘆鳴蜩
聲嘒嘒兮盛陽則求太陰逝兮皎皎貞素侔夷

惠兮帝臣是載尚其潔兮

黏蟬賦 并序

晉傅咸

櫻桃爲樹則多陰爲果則先熟有蟬鳴焉聊命
黏取退惟常蟬之得意於斯樹不知黏之將至
亦猶人之得於富貴而不虞禍之將來也

有嘉菓之珍樹蔚弘覆於我庭在赫赫之隆暑
獨肅肅而自清遂寓目以周覽見鳴蜩於纖枝
繫翠葉以長吟信厥樂之在茲苟得意於所歡
曾往黏而莫知匪爾命之適薄坐偷安而忘危
嗟悠悠之耽寵請茲覽以自規

鳴蟬賦

歐陽永叔

嘉祐元年夏大雨水奉詔祈晴于醴泉宮聞鳴
蟬有感而賦云肅祠庭以祇事兮瞻玉宇之崢
嶸收視聽以清憲兮齋予心以薦誠因以靜而
觀動兮見乎萬物之情於時朝雨驟止微風不
興四無雲以青天雷隱隱其餘聲乃席芳藹臨
華軒古木數枝空庭草間爰有一物鳴于樹顛
引清風以長嘯抱纖柯而永歎嘒嘒非管泠泠
若弦裂方號而復咽淒欲斷而還連吐孤韻以
難律含五音之自然吾不知其何物其名曰蟬

豈非因物造形能變化者耶出自糞壤慕清虛者邪凌風高飛知所止者耶嘉木茂樹喜清陰者耶呼吸風露能尸解者耶綽約雙鬚脩嬋娟者耶其爲聲也不樂不衰非官非徵胡然而鳴亦胡然而止吾嘗悲夫萬物莫不好鳴若乃四時代謝百鳥嚶兮一氣候至百虫鳴兮嬌兒姘女語鸚庚兮鳴機絡緯響蟋蟀兮轉喉弄舌誠可愛兮引腹動股豈勉強而爲之兮至於汚池濁水得雨而聒兮飲泉食土長夜而歌兮彼蝦蟆固若有欲而豔蚓又何求兮其餘大小萬物不可悉名各有氣類隨其物形不知自止有若爭能忽時變以物變成漠然而無聲嗚呼達士所齊萬物一類人於其間所以爲貴蓋已巧其語言又能傳於文字是以窮彼思慮耗其血氣或吟哦其窮愁或發揚其志意雖共盡於萬物乃長鳴於百世予亦安知其然哉聊爲樂以自喜方將考得失較同異俄而陰雲復興雷電俱擊大雨旣作蟬聲遂息

朱文公曰賦須是縝密盛得水住歐公蟬賦其名曰蟬這數句也無味朱語錄

古詩

蟬

蘇子瞻

蛻形污濁中羽翼便翾好秋來問何濶已抱寒
莖槁

蟬

梁緒雲

避雀喬枝裏飛空華殿曲天寒響屢嘶日暮聲
逾速繁吟如欲盡長韻還相續飲露非表清輕
身易知足

春蟬

元稹

我自東歸日厭苦春鳩聲作詩憐化工不遣春

蟬生及來商山道山深氣不平春秋兩相似虫
豸百種鳴風松不成韻蜩蟬如沸羹豈無朝陽
鳳羞與微物爭安得天上雨奔渾河海傾蕩滌
反時氣然後好清明

蟬

方千

細聲頻斷續審聽亦難分髮鬢應移處從容却
不聞蘭棧朝咽露樹隱暝吟雲若遣鄉愁起吾
懷只是君

聽蟬

楊廷秀

一隻初來報早秋又添一隻說新愁兩蟬對語
雙垂柳知聞先休聞後休
一殼空空紙樣輕風前却有許多聲叫來叫去
渾無事叫到詩人白髮生
說露談風有典章詠秋吟夏入宮商蟬聲無一
些煩惱自是愁人枉斷腸

蜚蝗

蝗附

羣書要語

爾雅 蜚蝗蜚蝗也注黑甲蟲噉糞者也

螿

有斧蟲一名螿螿爾雅

仲夏之月螿蝗生

注螿蛸母也

記月令

古今事實

螿蝗轉丸

莊子曰螿蝗之智在於轉丸螿蝗能以土包糞
轉成丸

螿蝗捕蟬

莊子曰莊周游於雕陵之樊覩一異鵲自南方
來者執彈而留之其留覩一蟬方得美蔭而忘
其身螿蝗執翳且搏之見得而忘其形異鵲從

而利之見利而忘其真莊周怵然曰噫物固相累二類相召也捐彈而反走

一說見黃雀門

怒臂當車

齊莊公出獵有螳螂舉足將搏其輪問其御曰此何蟲對曰此螳螂也為蟲知進而不知退不量力而輕就敵公曰此為天下勇士矣迴車避之勇士歸焉淮南子

古今文集

古詩

蠅娘

蘇子瞻

洪鍾起暗室飄瓦落空庭誰言轉丸手能作殷牀聲

促織

羣書要語

莎雞一名促織一名絡緯一名蟋蟀古今注蟋蟀蝥也爾雅季夏之

月蟋蟀居壁月今六月莎雞振羽七月在野八月在宇九月在戶十月蟋蟀入我牀七月蟋蟀

在堂歲聿其暮國風里語曰促織鳴懶婦驚詩

風戾戾而動柯露零零而隕樹月轉景而西

頽漢回波而東注厲清響於長宵激悲聲以迄
曙盧湛蟋蟀賦蟋蟀俟秋吟王褒頌滲容與而

獨倚兮蟋蟀鳴於西堂楚辭

詩句促織鳴東壁選蟋蟀依桑野選客愁連蟋

蟀杜蟋蟀近中堂杜蟋蟀鳴床帷杜蟋蟀甚微

細哀鳴何動人杜幽響泄潛螿韓

古今事實 闕

古今文集

雜著

放促織賦

楊廷秀

揚子朝食既徹步而圍嬉遙見一二穉子集乎
遠華之堂環焉若其圍俯焉其若窺隙焉其若
追也揚子趨而往視之蓋促織之始生而尚微
墮地而未能飛者也嘉遜而不市故高步而不
卑辟穀而不飪故癯貌而不肥既蚱蟴其脩髯
亦翡翠其薄衣彼其臂短而脛甚長是故將進
而趨趨翹立而孤危也揚子笑謂穉子曰汝豈
識之乎是固夫霜淒露感而恤緯征人之裳者
歟身勤心苦而提耳女工之荒者歟晝間宵喧
自基而徂堂者歟多言強聒身隱而聲彰者歟

若悲若怨若憤若歎而吟嘯秋夕之清長者歟
奚失據於幽茂而貼身於躡藉若是其幼日孱
也廼命穉子藉以羽扇遷之叢間見密葉其躍
如曝冬日其欣然穉子反命曰是虫也若子產
之魚圉圉焉洋洋焉矣使穉子反視之至則行
矣

古詩

促織

蘇子瞻

月叢號耿耿露葉泣搏搏夜長不自暖那憂公
子寒

律詩

促織

杜甫

促織甚微細哀音何動人草根吟不穩床下夜
相親久客得無淚放妻難及晨悲絲與急管感
激異天真

促織

楊廷秀

一聲能遣一人愁終夕聲聲曉未休不解繅絲
替人織強來出口促衣裘

螢

羣書要語

螢火一名暉夜一名燐一名丹良

一名丹鳥夜光一名宵燭腐草為

之食古今注一名夜照一名熠燿王氏本草夏

小正曰丹鳥羞白鳥丹鳥者謂丹良也白鳥者

謂蚊蚋也其謂之鳥者重其養也凡有翼者為

鳥羞也羞者進也大戴禮季夏之月腐草為螢

月令熠燿宵行東山類君子之有道入暗室而

不欺同至人之無迹懷明義以應時駱賓王賦

詩曰

暗飛螢自照杜螢光拂夕流韋應物螢鑒

緣帷徹杜日暮拾流螢杜騰空類星隕拂木若

花生梁簡文帝風亂池上螢露光竹間月李疑

古今事實

佩螢火丸

務成子螢火丸方云漢武威太守劉子南從道

士尹公授其方合而佩之永平中於武威北界

遇虜戰敗為寇所圍矢下如雨未至子南馬數

尺矢輒墮地終不能中傷虜以為神人乃解圍

去神仙感應篇

囊螢照書

車胤字武子家貧無燈火以絹囊盛螢火以照

書夜讀

聚螢夜放

隋煬帝大業末天下已盜起帝於景華宮徵求
螢火數斛夜出遊山如放火光徧岩谷

古今文集

雜著

螢賦 并序

晉傅咸

余曾獨處夜不能寐顧見螢火遂有感於是執
以自炤而為之賦其詞曰

潛空館之寂寂兮意遙遙而靡寧夜耿耿而不
寐兮憂悄悄而多傷哀斯火之煙滅兮近腐草
而化生感詩人之攸懷兮覽熠燿於前庭不以
姿質之鄙薄兮欲增輝乎泰清雖無補於日月
兮期自照於陋形當朝陽而戢景兮必宵昧而
是征進不競於天光兮退在晦而能明諒有似
於賢臣兮於疎外而盡誠蓋物小而喻大兮固
作者之所旌倣乃光而喻爾職兮庶有表乎忠
貞

古詩

秋螢引

劉禹錫

漢陵秦苑遙蒼蒼陳根腐草秋螢光
夜空寂寥金氣靜千門九陌飛悠揚
紛綸輝映互明滅金爐星噴灯花發
露華洗濯清風吹攢茆不定招搖垂
高麗翠息過珠網斜歷璇題舞羅幌
曝衣樓上拂香裙承露臺前轉仙掌
槐市諸生夜對書北窻分明辨魯魚
行子東山起征思中郎騎省悲秋氣
銅雀人歸自入簾長門帳開來照淚
誰言向晦常自明童子走捕嬌女爭
天生有光非自銜遠近低昂暗中見
撮蚊妖鳥亦夜啼飛翅如車輪人不見

螢火

陳去非

翩翩飛蛾掩明燭見烹膏油罪莫贖
嘉爾螢火不自欺草間相照光煜煜
却馬已錄仙人方映書曾登君子堂
不畏月明見陋質但畏風雨難為光

律詩

螢

梁元帝

著人疑不熱集草訝無煙到來燈下
暗翻在雨中然

螢火

杜甫

幸因腐草出敢近太陽飛未足臨書卷時能點
客衣隨風隔幔小帶雨傍林微十月清霜重飄零
何處歸

次韻螢火

陳無已

年侵觀物化共被歲時催熠熠孤光動翩翩度
水來雖能穿幔人已復受風回投卷吾衰矣微
吟子壯哉

螢

羅鄴

水殿清秋玉戶開飛光千點去還來無風無月
長門夜頻到階前點綠苔

徘徊無燭冷無煙秋迳莎庭入夜天休向書窻
來照字近來紅燭滿歌筵

見螢火

杜甫

巫山秋夜螢火飛簾竦巧入坐人衣忽驚屋裏
琴書冷復亂簷前星宿稀却繞井欄添箇箇偶
經花藥弄輝輝滄江白髮愁看汝來歲如今歸
未歸

新編古今事文類聚卷之四十八

後集

新編古今事文類聚卷之四十九

後集

建安祝穆和父編

蟲牙部

蟻

羣書要語

大螳俗呼為馬虵蟬小螳齊人呼為蟻蟬飛螳有翅其子蚘注蟻卵

爾雅 蟻為玄駒 大戴禮注 牛亨問蟻為玄駒者

何答曰河內人見馬數十萬騎皆大如黍米遊遊往來從朝至暮家人以火燒之人皆成蚊蚋

更須校其美惡

馬皆成大蟻故今人呼蚊蚋曰黍民蟻曰玄駒
古今注有黑黃大小數種之蟻廣志饋食之豆
蠹也蛤蚘蟻醢周禮蟻子時術之注蟻蚘蟬也微
蟲爾時術其功乃成大垤也學記南方赤蟻若
象楚辭蟻慕羶莊子道在蟻蟻同上千丈之堤
以蟻穴而壞韓子蟻封穴戶大雨將集焦贛易
林蟻有無弱之智抱朴子鯨鯢吐舌蟻附之因
吞之又開鱗甲使蟻入其中乃奮迅則舐取之
揚子異物志

詩曰行蟻上枯梨杜蟻六液漏成河鮑明遠白蟻

戰酣山兩來 錢昭度

古今事實

蟻壤得泉

齊威公伐孤竹山中無水隰朋曰蟻冬居山之
陽夏居山之陰蟻壤寸而有水乃掘地遂得水
韓子

群蟻觀鰲 見鰲門

殺蟻得禍

桓謙字敬祖太元中忽有人皆長寸餘悉被鎧
持槩緣机登竈尋飲食之所或有切肉以槩刺

取徑入穴將山道士朱應子以沸湯澆所入處
寂不復出因掘之有斛許大蟻死在穴中譙後
以門釁同滅劉敬叔異苑

淋下蟻聞見耳門

救蟻得報

董昭之過江見蟻骨一短蘆昭之救之後繫獄
蟻領群蟻穴獄昭之遂得免東陽元寔齊諧記

黑赤交鬪

後魏顯宗時兗州有黑蟻與赤蟻交鬪長六十
步廣四寸赤蟻斷頭而死東魏孝靜時鄴下

有黃蟻與黑蟻鬪五行記

皇帝避蟻

哲宗朝程頤為崇政殿說書頤聞 帝在宮中
盥而避蟻因畢講請曰有是乎 上曰然誠恐
傷之耳頤曰推此心以及四海帝王之要道也
上稱善

編竹渡蟻

二宋少時有胡僧曰小宋它日魁天下大宋亦
不失甲科後十年僧驚問大宋曰公丰神頓異
如能活數千萬之命者試思之宋曰堂下比有

蟻穴為暴雨所侵群蟻繚繞穴傍吾戲編竹橋以渡之耳僧曰是也小宋今年首捷公終不出其下比唱第小宋果中魁選章聖臨朝謂第不可先乃以大宋為第一

恐踐行蟻

徐孝節先生自少戒殺見聚蟻場然惟恐踐之行狀

古今文集

雜著

蚍蜉賦并序

李德裕

此郡多蚍蜉所居臨流實繁其類或聚於衽席或入於盤盂終日厭苦而不知可禦之術固戲為此賦令稚子燁和之

惟江潭之下國况幽居於澤畔何螻蟻之微物亦有徒而凌亂或泮散於經笥或寅緣於食案予乃戲而問之曰爾能居厚地而漏江河無乃處吾身而為大患蟻不能言辭以意宣其旨曰我稟形於造化亦一氣之所甄嘗濟齊師之乏亦聞媯德之獯覩封穴而知雨驗寸壤而得泉出以時而不息故學者得而稱焉戴粒而遊若

巨鰲之冠神岳繞磨而行若日月之麗清天若
乃依垤緣壁淫淫弈弈其聚無聲其行無迹值
晏溫而出遊當祁寒而入隙迅雷作而不駭微
雨灑而自適生雖瑣細亦有行藏止若群羊之
聚進如旅鴈之翔乘其便也雖鱣鯨之可制無
其勢也雖蛭蝻而不傷今願悔過戢于垣墻豈
同青蠅之點白汙君子之衣裳

律詩

禽虫一章

白居易

蟻王化飯爲臣妾螺母偷虫作子孫彼此假名
非本物其間何怨復何恩

觀蟻

楊廷秀

偶爾相逢試問途不知何事數遷居微軀所饌
能多少一獵歸來滿後車
一騎初來隻又雙全軍突出陣成行策勛急報
千夫長渡水遠爭一葦航

蠅

羣書要語

其類有蒼者聲雄壯負金者聲清
聒其聲在翼身青者能敗物巨者

頭如火 酉陽雜俎 匪雞則鳴蒼蠅之聲 齊風蒼蠅之飛不過十步自託騏驥之尾乃騰千里之路 光武與魏器書 或問蒼蠅紅紫注似朱而非朱也 揚子青蠅嗜肉汁而忘溺死衆人貪世利而陷罪禍 班固難莊

詩句 穴紙出飛蠅 坡名譽過耳如蒼蠅 歐知登

夏畦觀耘耕汗顏 炙背棲蒼蠅 山谷

古今事實

青蠅刺繞

青蠅大夫刺幽王也營營青蠅止于樊豈弟君

子無信讒言營營青蠅止于棘讒人罔極交亂四國營營青蠅止于榛讒人罔極構我二人

暴屍驅蠅

楊章為杜喬李固薦為平原令後喬固被刑章行赴洛見喬固暴屍驅逐蠅虫 東觀漢記

青蠅驗腦

章遵為揚州刺史行部聞道旁女子哭聲甚哀問之云夫遭燒死導敕吏輿屍到令人守屍曰當有物自往吏白有蠅聚頭所遵令披視得鐵錐貫腦考問以淫殺夫 益部耆舊傳

怒蠅棄筆 見福急門

誤墨成蠅 見畫門

青蠅弔客 見吊慰門

青蠅報赦 見赦門

食中有蠅 見庖竈門

杖閣放蠅

庫狄伏連居室患蠅杖門者曰何故放入 北史

食菘蠅集

武儒衡時元稹倚宦官知制誥儒衡厭鄙之會食菘蠅集其上儒衡揮以扇曰適從何來處集

於此一坐皆失色

拂蠅觸睫

段成式讀書有蠅觸睫隱字偶拂殺一蠅翼似

蝟冠似蜂 六帖

號凍蠅

王方慶體質鄙陋言辭魯鈍為鳳閣侍郎張元一謂之被凍蠅 朝野僉載

古今文集

雜著

罵青蠅文

張復之詠

火帝降炎臣興邈矣六合歆然如蒸萬物長羸
如騰如凌不可謝其玄造不可名其至能忽陰
薄陽化生此青蠅觸類苒苒朋飛薨薨切羶而
蠹芳筵預登當是之際無人不憎我疑姦人之
鬼佞人之鬼埋鬱不散託蠅寄跡不然者何以
變白爲黑變黑爲白所以恣其點染所以遂其
慙慝奸佞之作敗君之德黑白之變爲物之賊
所謂欲蓋而彰順非而澤使潔者不得自明玄
者不得自默連壁失珍兼金奪色致義士之感
心幾撫髀而太息衆君子矯而議曰天運地施
融融蚩蚩何者不有何生不宜信妍醜以自任
亦浩混乎無知蠅斯眇末胡足罵爲殊不知天
地不言假乎仁者持準操程以上化下使惡不
黷善真不類假廓唐堯之雍熙稱周王之風雅
防邪之萌雖小不捨厚汚若成悔何及也于是
連呼童奴疾致如意當案輟食對客攘臂指西
風而罵曰未斷爾祖終惡爾類營營乎青蠅止
于藩

憎蒼蠅賦

歐陽永叔

蒼蠅蒼蠅吾嗟爾之爲生既無蜂蠆之毒尾又

無蚊蟲之利觜幸不爲人之畏胡不爲人之喜
爾形至眇爾欲易盈杯盃殘瀝砧几餘腥所希
抄忽過則難勝苦何求而不足乃終日而營營
逐氣尋香無處不到頃刻而集誰相告報其在
物也雖微其爲害也至要若乃華榱廣厦珍簾
方牀炎風之燠夏日而長神昏氣感流汗成漿
委四肢而莫舉眊兩目其茫洋惟高枕之一覺
冀煩歎之暫忘念於爾而何負乃於吾而見殃
尋頭撲面入袖穿裳或集眉端或沁眼眶目欲
瞑而復警臂一作手已揮而猶攘於此之時孔子

何由見周公於髣髴莊生安得與蝴蝶而徜徉
此其爲害者一也又如峻宇高堂嘉賓上客沽
酒市脯鋪筵設席聊娛一日之餘閑柰爾衆多
之莫敵或集器皿或屯几格或醉醇酎因之沒
溺或投熱羹遂喪其魄諒雖死而不悔亦可戒
夫貪得尤忌赤頭號爲景跡一有霑汚人皆不
食柰何引類呼朋搖頭鼓翼聚散倏忽往來絡
繹方其賓主獻酬衣冠儼飾使吾揮手頓足改
容失色於此之時王衍何暇於清談賈誼堪爲
之太息此其爲害者二也又如醯醢之品醬醢

之制及時月而收藏謹餅罌之固濟乃衆力以
攻鑽極百端之窺覷至於大截肥牲嘉穀美味
蓋藏稍露於罅隙守者或時而假寐纔稍怠於
防嚴已輒遺其種類莫不養息蕃滋淋漓敗壞
使親朋卒至索爾以無歡城獲懷憂因之而得
罪此其爲害者三也是皆大者餘悉難名嗚呼
止棘之詩垂之六經於此見詩人之博物比興
之爲精宜乎以爾刺讒人之亂誠可嫉而可
憎

律詩

秋蠅

楊廷秀

秋蠅知我政哦詩得得緣眉復入髭欲打群飛
還歇去風光乞與幾多時

詩話

詠蠅以刺

熙寧初外學置官師職簡地親多在宴席有學
官喜評語同僚苦之詠蠅以刺曰衣冠有時遭
點染盤杯無處不追隨

右山

詠窻上蠅

古靈見窻上蠅曰百年鑽故紙未見出頭時

蠅虎

形似蜘蛛而色灰白喜捕蠅一名蠅蝗

羣書要語

古今事實

古今文集

古詩

蠅虎

陳無已

物微趣下世不數隨力捕生得稱虎匿形注目
搖兩股卒然一擊勢莫禦十中失一八九取吻
間流血腹如鼓却行奮臂吾甚武明日淮南作
端午

蚊

蠛蠓附

羣書要語

見蠛

秦謂之蚋楚謂之蚊

說文舟鳥羞

白鳥

夏小正

門呼蚊蚋為黍民

注

今

今

今

門見蠛
海上有蟲集蚊睫名曰焦冥

列子

蚊蚋嗜

膚則通宵不寐矣

莊子

詩句

蚊蚋當家口草石是親情

起西風為解紛

山谷

詩句

蚊蚋當家口草石是親情

盧仝

半夜蚊雷

蠛蠓

小蟲似蚋喜亂飛

爾雅

一名醯雞

莊子

因

雨而生見陽而死

列子

古今事考

開幃進蚊

齊桓公卧於柏寢謂仲父曰吾國富民殷無餘
憂矣一物失所寡人悒悒今白鳥營營是必飢
耳因開翠紗之幃進之其蚊有知禮者不食公
之肉而退其蚊有知足者噤反子文公之肉而退
其蚊有不知足者遂長噓短吸而食之及其飽
也腹腸為之潰破金樓子

使蚤負山

肩吾見狂接輿接輿曰日中何以語汝肩吾曰
已出經式義度孰敢不聽而化接輿曰是欺德
也其於治天下也猶涉海鑿河而使蚤負山也
莊子

聚蚊成雷

漢中山靖王朝天子置酒聞樂而泣問其故靖
王對曰臣聞衆喙漂山聚蚊成雷是以文王拘
於羑里孔子厄於陳蔡

覆射知蟲

東方朔傳郭舍人曰願問朔一事朔得臣願榜
一日朔窮臣當賜帛曰客從東方來歌謠且行
不從門入踰我垣墻遊戲中庭上入殿堂擊之
桓桓死者攘攘格鬪而死主人被創是何物也
朔曰長喙細身晝亡夜存嗜肉惡煙爲掌指所
捫臣朔愚戇名之曰蟲舍人辭窮當復脫禪

道術禁蚊

後漢趙炳有道術章安令惡其惑衆收殺之人
爲立祠於永康至今蚊蚋不能入

夏不驅蚊

吳猛少有孝行夏日常手不驅蚊懼其去己而
噬親也 孝子傳

碧綃蚊幃

崔祖思啓陳政事曰宋武帝節儉張妃房唯碧

綃蚊幃 海錄

未嘗有蚤

梁孫謙居身儉素牀施蘧蔭屏風夏日無幃帳
而夜卧未嘗有蚊蚋

獨無蚊蚋

梁湘東王蕭澤作金樓子曰荊州高齋盛夏之

月無白鳥余寢處於其中及移餘齋則聚蚊之聲如雷矣數丈之間如此之異吁可恠哉

蚊食露筋

舊傳有女子夜過高郵去郭三十里天陰蚊盛有耕夫田舍在焉其嫂止宿女曰吾寧處死不
可失節遂以蚊死其筋見焉人為立祠曰露筋廟

蚊子啜喝

歐陽公云予作憎蠅賦可憎矣尤不堪蚊子自遠啜喝來咬人也聞見錄

道猶醯雞

孔子聞老聃之言出告顏回曰丘之於道也其猶醯雞歟莊子

古今文集

雜著

蚋子賦并序

唐王周

蚋子之下有蠓子蠓子之下有浮塵子三者異乎皆狀小而黑世云巴蛇鱗介中微蟲所變耳三伏間晝飛夜息啞啄人飢膚動為瘡疖能飛不見其翼能嚙不見其口微眇之極雖緝密衣

服亦可通透莊生焦螟之說近之也至微之蟲
豸詩獨无蚋故作賦以廣之

蟲之至微名之曰蚋信乎蟻之別品爲復蟲之
餘裔君巢蚊之異類結搏牛之深契附諸鬱蒸
產彼蕪穢張華之識何以辨其兩翼離婁之明
何以見其長喙伺暑絺之漏露萃豐肌而睥睨
默然而至暗然而噬人之至靈何闕爾之所衛
人之至剛何反爾之所制狀斯咄咄籲於造物
何不恣蛇虺之毒必當與之爲避何不張虎豹
之口不敢與之爲忽豈其食人之膏血資己之
肥脂念膚體之何毀痛瘡痂之難沒吾將擷楸
葉以爲焚俾爾之銷骨者也

古詩

蚊

孟郊

五月中夜息飢蚊尚營營但將膏血求豈覺性
命輕顧已寧自愧飲人以偷生願爲天下恹一
使夜景清

葛愔

黃魯直

飛蚊遠床帷來傍青燈集微涼忽透隙如帶驚
雷入念彼无恹者中夜何嗟及天下同安眠西

風向秋急

平望蚊子

吳融

天下有蚊子候夕嗜人膚平望有蚊子白晝來
 相屠不避風與雨群飛出菰蒲擾擾蔽天黑雷
 然隨船艦利觜入人肉微形紅且濡振蓬亦不
 懼至死貪膏腴舟人敢停棹陸者亦疾趨南北
 百餘里畏之如虎驅噫嘻天地間萬物各有殊
 陽者陽為任陰者陰為徒蚊蚋是何物夜後喧
 墻隅如何正曦赫吞噬當通衢人筋為爾斷人
 力為爾枯衣襟穢且甚盤饌腥有餘豈是陽德
 衰不能使消除豈是有主者此鄉宜毒荼吾聞
 蛇能螫避之則無虞吾聞蠱有毒見之可疾驅
 唯是此蚊子逢人皆病諸江南夏景好水木多
 蕭疎此中震澤路風月彌清虛前後幾來往襟
 懷未曾舒朝既蒙褰積夜仍跼蘧蔭雖然好吟
 詠其柰難踟躕人生有不便天意當何如誰能
 假羽翼直上言洪爐

憎蚊

歐陽永叔

擾擾萬類殊可憎非一族甚哉蚊之微豈足污
 簡牘乾坤量廣大善惡皆含育荒茫三五前民

物交相黷禹鼎象神姦蛟龍遠潛伏周公驅猛
獸人始居平陸邇來千百年天地得清肅大患
已云除細微遺不錄蠅蚋蝨蚤蟣蜂蝎虻蛇蝮
惟爾於其間有形纔一粟雖微無柰衆惟小難
防毒嘗聞高郵間猛虎死凌辱哀哉露筋女萬
古讎不復水鄉自宜爾可恠窮邊俗晨食下幃
慍盛暑泥駒犢我來守窮山地氣尤卑溽官閑
懶所宜惟睡宜偏足難堪爾類多枕席厭緣撲
薰簷苦煙燼燎壁疲照燭荒城繁草樹早氣飛
炎煇羲和驅日車當午不轉轂清風得夕涼如
赦脫囚梏埽庭露青天坐月蔭嘉木汝寧死它
時忍此見迫促翱翔伺昏黑稍稍出壁屋填窻
來若翳聚隙多可掬叢身疑陷圍聒耳如遭哭
猛攘欲張拳暗中如飛鏃手足不自救其能營
背腹盤飡勞扇拂立寐僵僮僕端然窮百計還
坐瞑雙目於吾誠不較在爾誠爲酷誰能推物
理死乃率人欲騶虞鳳凰麟千載不一矚思之
不可見惡者無由逐

江上蚊子

韋楚老

搖俠翅亞紅腹江邊夜起如雷哭請問貪婪一

點心腐肉填腹幾多足越女如花住江曲寒蛾
夜夜凝雙綠任君撩亂錦窓中十幅輕綃圍夜
玉

聚蚊謠

劉禹錫

沉沉夏夜空堂開飛蚊伺暗聲如雷嘈然倏起
初駭聽殷殷若自南山來喧騰鼓舞喜昏黑昧
者不分聰者感露花滴瀝月上天利觜迎人看
不得我軀七尺爾如芒我孤爾衆能我傷天生
有時不可遏爲爾設幄潛匡牀清商一來秋日
曉羞爾微形飼丹鳥

律詩

蚊

范希文

公監秦州西溪鹽場地多蚊蚋

飽去櫻桃重飢來柳絮輕但知求旦暮休更問
前程

虱

蚤附

羣書要語

虱齧人蟲也蟣蟲子也 說文 湯沐
具而蟣蟲相弔 淮南子 甲冑生蟣

蟲 韓子頭虱著身皆稍變而白身虱處頭皆漸

化而黑 抱朴子 似衣中蝨必須搯之 三國典畧

梁書 搏牛之蝨不可以破蝨 漢書

詩句 地下蟣蝨臣 盧仝 蝨聞湯沸尚血食 山谷

蚤 齧人跳蟲也 說文 得蚤者磨之齒牙為害身

也 曹植論 蚤蝨群攻卧不獲安 抱朴子 以新室

吞胡虜死異口中蚤蝨 漢書

古今事實

學射貫蝨

紀昌學射於飛衛使學視小如大紀昌於是縣蝨於牖南面而望之二年之後如車輪焉以觀餘物皆丘山也乃以燕角之弧孤蓬之箛射之貫蝨之心而懸不絕以告飛衛衛曰汝得之矣

頭蝨必剝

馬援擊尋陽山賊上書曰除其竹木譬如嬰兒頭多蟣蝨而剝之蕩蕩然蟣蝨无所復依書奏上大悅因出小黃門頭有蝨者皆剝之 東觀漢記

捫蝨論事

王猛隱居華山懷佐世之念桓温入關猛被緼袍而詣之面談當世之事捫蝨而言旁若無人温察而異之

多蝨不堪

嵇康與山濤書危坐一時痺不得搖性復多蝨爬搔無已而當褻以章服揖拜上官三不堪也

擇蝨夷然

晉顧和王導辟為揚州從事月旦當朝未入停車門外周顛遇之和方擇蝨夷然不動顛指和心曰此中何所有和徐應曰此中最是難測地

語林

不忍飢蝨

齊江泌性仁義衣弊蝨多綿褻置壁上恐蝨飢死乃復置衣中後終身無蝨

對客覓蝨

北齊邢子才位中書監脫落簡易不脩威儀有齋不居坐卧常在一小屋菓餌之屬置之梁上賓至下而共噉對客或解衣覓蝨且與劇談

親為擇蝨

馬子如為大行臺及文襄輔政見之哀其憔悴以股承其首親為擇蝨賜酒百瓶羊五百口粳米五百石子如曰無事尚被囚幾死若受此豈有生路耶

北史

衲衣養蟲

查道性淳古少寓狼山寺躬事薪水以給僧眾
衲衣不洗濯以養蟲後仕至龍圖閣待制 國老
閑談

撲殺佛子

無畏三藏飲酒食肉言行窟易律師不悅常令
宿于戶外律師中夜擲蟲投床下無畏即呼曰

撲殺佛子律師異之

鄭榮傳
信記

殺蚤不誠

以下係蚤

韓昭侯搔而痒亡一蚤求之甚急左右因取其
蚤蝨而殺之昭侯以此察左右不誠也 韓子

探蚤不停

齊卞士蔚居貧多病縈寢敗絮澡刷不謹澣沐
不時四體甕甕加以臭穢故葦席蓬纓之間探
採蚤蝨日不替手 自作賦序

託蚤指斥

齊卞彬為南康郡丞仕既不遂及著蚤蝨蝮蟲
蝦蟆等賦皆大有指斥

古今文集

雜著

大人先生傳

阮籍

其畧曰世之所謂君子惟法是脩惟禮是克手執圭璧足履繩墨行欲為目前檢言欲為無窮則少稱鄉黨長聞鄰國上欲圖三公下不失九州牧獨不見羣蟲之處禪中逃乎深縫匿乎壞絮自以為吉宅也行不敢離縫際動不敢出禪襠自以為得繩墨也然炎丘火流焦城熾都羣蟲處於禪中而不能出也君子之處域內何異夫蟲之處禪中乎此亦籍之胃懷本趣也

蟲賦

李商隱

亦氣而孕亦卵而成晨鷺露鶴不知其生汝職惟嚙而不善嚙回臭而多跖香而絕

後蟲賦

并序

陸龜蒙

余讀玉溪生蟲賦有就顏避跖之歎似未知蟲作後蟲賦以矯之

衣緇守白髮華守黑不為物遷是有垣德小人趨時必變顏色棄瘠涵腴乃蟲之賊

古詩

和王樂道烘蟲

王介甫

秋暑汗流如炙輟敝衣蒸濕塵土浣施之衆蟲

當此時擇肉甘於虎狼餓咀嚼侵膚未云已爬搔刺骨終無那時時對客輒自捫十百所除纔幾箇皮毛得氣強復活爪甲流丹真暫破未能湯沐取一空且以火攻令少挫踞爐熾炭已不暇對竈張衣誠未過飄零乍若蛾赴燈驚擾端如蟻旋磨欲毆百惡死焦灼肯貸一凶生棄播已觀細黠無所容未放老姦終不墮然臍郿塢患溢世焚寶鹿臺身易貨冢中燎入化秦屍池上掀隨遷莽坐彼皆勢極就煙埃况汝命輕侔涕唾逃藏壞絮尚欲索埋沒死灰誰復課熏心得禍爾莫悔爛額收功吾可賀猶殘衆蟻恨未除自許寧能久安卧

和介甫烘蟲

司馬君實

天生萬物名品夥嗟爾爲生至么麼依人自活反食人性喜伏藏便垢浣晨朝生子暮生孫不日蕃滋踰萬箇透踈緣隙巧百端通夕爬搔不能卧我歸彼出疲命奔備北驚南厭搜邏所禽至少所失多捨置熏燒無術柰加之炭上猶晏然相顧未知亡族禍大者洋洋迷所適奔走未停身已墮細者懦怯但深潛乾死縫中誰復課

黑者抱髮亦憂疑逃入縹頭默相賀腥煙焰起
遠襲人袖擁鼻端時一唾初雖快意終自咎致
爾纖夷非爾過吾家篋笥本自貧况復為人苦
慵惰體生鱗甲未能浴衣不離身成脆破朽繒
壞絮為淵藪如麥如麻寢肥大虛腸不免須侵
人肯學夷齊甘死餓醯酸蚋聚理固然爾輩披
攘我當坐但思努力自潔清羣蟲皆當遠
逋播

蠹
蠹魚書附

蝟蛄蠹木中蠹蟲也 爾雅

羣書要語

蟬 淫 白魚也 注 衣書中蠹蟲 爾雅

古今事實

獻桂蠹

文帝賜尉佗書衣物佗因使者獻桂蠹一器 漢

書 桂蠹紫色香卒有味噉之去陰痰之疾 大業

拾遺錄

芸香辟蠹 見藏書門

古今文集

雜著

蠹化

陸龜蒙

橘之蠹大如小指首負特角身感感然類蜡蟻
 而青翳葉仰齧飢蚕之速不相上下人或振觸
 之輒奮角而怒氣色桀驁一旦視之凝然弗食
 弗動明日復往則蛻為蝴蝶矣力力拘拘其翎
 未舒襜黑鞬倉分朱間黃腹瑣而橢墮綏纖且
 長久醉方悟羸枝不揚又明日往則倚薄風露
 攀緣草樹聳空翅輕瞥然而去或隱蕙隙或留
 篁端翩旋軒虛颺曳紛拂甚可愛也須臾化螿

網而膠之引絲環纏牢若攀枯人雖甚憐不可
 解而縱矣噫秀其外類有文也默其聲類有德也
 不朋而遊類潔也無嗜而食類廉也向使前不
 知為橘之蠹後不見觸螿之網人謂之鈞天帝
 居而來今復還矣天下大橘也名位大羽化也
 封畧大蕙篁也苟滅德忘公崇浮飾傲榮其外
 而枯其內害其本而窒其源得不為大螿網而
 膠之乎觀吾之蠹化者可以惕之

律詩

係蠹書魚

詠壁魚

李遠

鱗細粉光鮮開書亂眼前透窻疑漏網落硯似
流泉潛穴河圖內蚕鈎乙字邊莫言鬢鬣小食
盡白蘋篇

新編古今事文類聚卷之四十九

後集

新編古今事文類聚卷之五十

後集

建安祝和和父編

蟲豸部

蜘蛛

羣書要語

蠶

音

土

蜘蛛

在地

中

草

蜘蛛

絡

幕

蟪

長

踦

為

小

脚

者

俗

呼

有在

器下有以絲於籬落間緣壁捕蠅者

廣志

長踦

河內人謂之喜母著人衣當有親客至

詩

蟪

蛸在戶

東山

獨星懸於浮處遂設網於四隅

晉

成公綏賦

詩句

玉臺生網絲 江淹 蜘蛛網四屋 張景陽 蛛

絲 胃鬢長 杜 網蟲垂戶 織 選 絲窠埽還成 韓

古今事實

効蛛結網

湯出見羅者湯下車命解其三面而置其一面更化之祝曰昔蛛螫作網今人學結欲左者左欲右者右欲高者高欲下者下吾取其犯命者世紀

布網執豸

晉公子重耳奔齊與五臣游乎大澤之中蜘蛛布網曳繩執豸而食之公子重耳乃撫僕之手駐駟而觀之顧其臣咎犯曰此蟲也智之薄者矣猶役其智布其網曳其繩執豸而食之况乎人之有智而不能廓垂天之網布絡地之繩似供方丈之御是曾不如蜘蛛之智孰可謂之人乎咎犯曰公子慎勿言也君終行之則有邦有嗣也符子

蜘蛛占喜

樊噲問陸賈自古帝王人君皆云受命於天謂

有瑞應豈然乎賈曰有之夫目睨得酒食火花
得錢財乾鵲噪而行人至蜘蛛集而百事喜小
故猶徵大亦宜然故目睨則呪之鵲噪則餒之蜘蛛
集則放之况天下大寶人君非天命何以得
之西京雜記

號蜘蛛隱

楚國龔舍初隨楚王朝宿未央宮見蜘蛛焉有
赤蜘蛛大如栗四面縈羅網有蟲觸之而死者
退而不能得出焉舍乃歎曰吾生亦如是耳任
宦者人之網羅也豈可淹歲於是挂冠而退時

人笑之謂舍為蜘蛛之隱金樓子

蛛網必毀

王守一自稱終南山人布衣賣藥於洛陽市嘗
携一拄杖每見蛛網必以杖毀裂盡淨而後已
或問之曰天地之間飛走之屬捕逐搏拏固非
一物均是為口腹以養性命獨蜘蛛結網張羅
設機巧以害物吾是以惡之勝非錄

蜂螫蜘蛛

處士劉易隱居玉屋山嘗於齋中見一大蜂胷
于蛛網蛛搏之為蜂所螫墜地俄傾蛛鼓腹欲

裂徐行入草蛛齒芋梗微破以瘡就齒處磨之
良久腹漸消輕躁如故自後人有爲蜂螫者接
芋梗傳之則愈 筆談

古今文集

雜著

喜徵論

李德裕

陸賈稱螭子垂而百事喜不徵其故何也凡人
將有喜兆必垂於冠冕余嘗思之蓋以人肖圓
方之形稟五行之氣有生之最靈者也如景如
火忽有歛然感氣發於圓首之上其榮盛也如
陽氣發生煙炳涵煦有變衰也如秋氣索然寂
寞沉瘁雖不能自覩其鑒明者必可察之唐舉
許負疑用此術所以望表而知窮遠何以明之
淑春愛景必有螭子垂於簷楹之間室有明燭
膏燼必垂於屏幃之際喜氣將盛故集於冠冕
之上以此推之無所逃也

秋蟲賦 并序

羅隱

秋蟲蜘蛛也致身羅網間實腹亦羅網間愚感
其理有得喪因以賦之
物之小兮迎羅而斃物之大兮兼網而逝網也

者繩其小而不繩其大吾不知爾身之危兮腹
之饑兮吁

蜘蛛賦

張文潛

魚遊假淵鳥棲求木而我所宅獨取諸腹巢于
墻屋人不予取朝蠅暮蚊食人所惡彼賤物所
養而無益於世雖名人兮斯蟲是愧

古詩

詠蜘蛛

梅聖俞

日結一尺網知吐幾尺絲百蟲爲爾食九腹尚
苦飢

蜘蛛諷

孟郊

萬類皆有性各各稟天和蠶身與汝身汝身何
太訛蠶身不爲已汝身不爲他蠶絲爲衣裳汝
絲爲網羅濟物幾無功害物日已多百蟲雖切
恨其將柰爾何

蜘蛛諭

唐蘇拯

春蠶吐出絲濟世功不絕蜘蛛吐出絲飛蟲成
聚血蠶絲何專利爾絲何專孽映日張網羅遮
天亦何別儻居要地門害物可堪說網成雖福
已網敗還禍爾小人與君子利害一如此

蠶蛛行

張芸叟

誰謂爾蠶巧謀身一何踈斯民患寒冽爾為裳
與襦斯民患裸赤爾使曳且婁餘事及土木自
庇一縷無彼蛛豈無絲結網緣庭除朝昏伺羣
飛所得充膏腴反顧爾蠶笑容容乃良圖如何
為民患不自愛其軀屈原於國智晁錯於身愚
石顯以佞寵望之以讒誅須知磊落人死耳不
為蛛

律詩

絕句

來鵠

寂寞閑堦草亂生簟涼風動若為情不知獨坐
閑多少看得蜘蛛結網成

省中

王介甫

萬事悠悠心自知強顏於世轉參差移床獨向
秋風裏卧看蜘蛛結網絲

田園雜詠

范至能

靜看簷蛛結網低無端妨礙小蟲飛蜻蜓倒挂
蜂兒窘催喚山童為解圍

觀簷間蜘蛛

楊廷秀

蜘蛛作網祗愁踈密了還遭小雨餘漏却飛蟲

渾細事無妨網得萬真珠

觀雨中蛛絲五首

楊廷秀

雨打蛛絲不打蛛雨來蛛入畫簷隅網羅滿腹
輸渠巧也只蠅蚊命屬渠

雨罷蜘蛛却出簷網絲小減再新添莫言辛苦
無功業便有飛蟲密處粘

空中仰面却翻身寂似毗耶不動尊忽有一蚊
來觸網手忙脚亂便星奔

走得團圓織得窠群飛來往不逃他網羅外面
遭多少枉了辛勤設網羅

網羅最密是蛛絲却被秋蚊聖得知粘著便飛
來不弄蛛絲也解有疎時

戲題簷間蜘蛛

楊廷秀

屋角籬尖竹樹陰可憐用盡許機心凝身不動
如無物頓網輕搖試有禽絲貫日華明五色戲
隨風舞忽千尋看渠經緯來還去忘却推頰立
不禁

詩話

詠蛛譏刺

翟嗣宗尉臨淮頗爲監司所窘遂於臨淮館驛

題蜘蛛詩云織絲來往疾如梭長愛騰空作網
羅害物身心雖甚小謾天網紀亦無多林間宿
鳥應嫌汝簾下飛蟲最懼他莫學螳螂捕蟬勇
須知黃雀柰君何林子中時為發運使過而見
之召而誚責且戒無為浮薄復齋謾錄

蛙

蟾蜍附

羣書要語

一名蝦蟆亦曰蛤說文藟山湖水
東流其中多活即師注科斗也山

海經一名活東爾雅一名田雞又曰水雞見詩

話科斗蝦蟆子也形圓有尾聞雷震則尾脫脚

生崔豹古今注百越人以蝦蟆為上味疥者皮

最佳故越人云不可脫去此乃錦襖子尚書故

實蠃氏掌去鼃黽焚牡鞠以灰洒之則死秋官

老蝦蟆化為鴉淮南子注指蝦蟆使舞皆應弦

節神仙傳世言蝦蟆蜈蚣蛇三物相值皆不動

彼此畏食也坡詩注

詩句蛙鼃鳴無謂問問祗亂人韓田家推五行

水旱卜蛙聲章孝標廢沼蛙蠃淫坡半夜青蛙

聖得知韓盆池一夜青蛙鳴到曉韓

蟾蜍

三足

蝦蟆也

說文

銳頭皤腹

東方虬蟾蜍

賦

稱其異則畫地成川語其神則登天入月上

古今事實

培井蛙

公孫龍問於魏牟曰龍少學先生之道合同異離堅白自以為至達今聞莊子之言泯然異之敢問其方公子牟隱机太息仰天而笑曰子獨不聞夫培井之鼃乎謂東海鱉曰吾樂與吾跳梁乎井幹之上入休乎缺甃之崖赴水則接腋持頤蹶泥則沒足滅跗還軒蟹與蚪莫吾能

若也且夫擅一壑之水而跨時培井之樂此亦至矣夫子奚不時來入觀乎東海之鱉左足未入而右膝已繫矣於是逡巡而却告之海曰夫千里之遠不足以舉其大千仞之高不足以極其深禹之時十年九潦而水弗為加益湯之時八年七旱而崖不為加損夫不為頃久推移不以多少進退者此亦東海之大樂也於是培井之蛙聞之適適然驚規規然自失也且夫知不知是非之意而猶欲觀於莊子之言是猶使蚤負山商鉅馳河也必不勝任矣

秋水篇

式怒蛙

越王屢伐吳欲人之輕死也出見怒蛙乃爲之式從者曰奚敬於此曰爲其有氣故也韓非子

沉竈生蛙

趙襄子以尹鐸有寬政於晉陽其心必和乃守晉陽後晉師圍而灌之沉竈生鼃民無叛意

拾埽投鼃

燕太子丹自喜得荆軻永無秦憂日與軻之東宮臨池而觀軻拾埽投鼃太子令人奉金丸進之史

問蛙喜怒

艾子使於燕燕王曰吾小國也日爲強秦所侵徵求無已吾國貧無以供之欲草兵一戰又力弱不足以拒敵如之何則可先生其爲謀之艾子曰亦有分也王曰其有說乎艾子曰昔有龍王逢一蛙於海濱相問訊後蛙問龍王曰王之居處如何王曰珠宮貝闕翬飛璇題龍復問汝之居何如蛙曰綠苔碧草清泉白石復問曰王之喜怒如何龍曰吾喜則時降膏澤使五穀豐稔怒則先之以暴風繼之以飛電使千里之內

寸草不留龍問蛙曰汝之喜怒何如曰吾之喜則清風明月一部鼓吹怒則先之以努眼次之以腹脹然至於脹過而休於是燕王慙色

蝦蟆無尾

艾子浮於海夜泊島嶼中夜聞水下有人哭聲復若人言遂聽之其言曰昨日龍王有令應水族有尾者斬吾鬣也故懼誅而哭汝蝦蟆無尾何哭復問有言曰吾今幸無尾但恐更理會科斗時事也

蛙蝦蟆鬪

漢武帝元鼎五年秋蛙與蝦蟆俱鬪是歲四月將軍衆十萬征南越開九郡

長安食蛙

武帝欲籍阿城以南墊室以東宜春以西爲上林苑東方朔諫以謂此地主宜姜芋水多蛙魚貧者得以人給家足無飢寒之憂

朔傳

井底蛙

公孫述稱帝於蜀隗囂使馬援往觀之援素與述同里閉相善以爲既至當握手歡如平生而述盛陳陞衛以延援入欲授援以封侯賓客皆

樂留援曉之曰公孫不吐哺走迎國士反脩飾
邊幅如偶人形何足久稽天下士乎因辭歸謂
囂曰子陽井底蛙耳而妄自尊大

鳴為官私

晉惠帝在華林園聞蝦蟆聲問左右曰此鳴者
為官乎為私乎侍中賈胤對曰在官地為官在
私地為私

能禁蛙鳴

梁沈僧照別名法朗少事天師道士後為山陰
令時武陸王紀為會稽宴集池亭蛙鳴聒耳王
曰殊廢絲竹之聽僧照祝厭便息日晚王欲其
復鳴僧照曰王歡已闌令汝恣鳴即喧聒

兩部鼓吹

齊孔珪字德璋為都官尚書不樂門庭之內草
萊不剪中有蛙鳴或曰欲為陳蕃乎珪曰我以
此當兩部鼓吹何必効陳蕃王晏鳴鼓候之聞
羣蛙鳴曰此殊聒人耳珪曰我聽鼓吹殆不及
此晏慙

遇蝦蟆毒

丘傑年十四遭母喪以熟菜有味不嘗於口歲

餘忽夢母曰汝噉生菜遇蝦蟆毒靈牀前有三丸藥可取服之傑驚起果得甌中藥服之下科斗子數升南史

作賦寓刺

齊卞彬著蝦蟆賦云紆青拖紫名爲蛤魚世謂比令僕也又云科斗唯唯群浮閭水唯朝繼夕聿役如鬼比今史諮事也

綠衣乞命

某朝皇帝尚食將供蝦蟆充御膳上忽夢綠衣人數伯乞貸命後方悟其爲蝦蟆因禁採捕或

云蝦蟆能食蝗蟲故禁採捕

此事不記何書當考

蟾蜍八月

係蟾蜍見月門

蝦蟆蝕月

見月蝕門

古今文集

雜著

鳴蛙賦 并序

張文潛

余寓山陽學舍夏大雨屋四隅成塘聚蛙以千計聲鳴不絕夜爲不能寐客有獻予以殺蛙之術曰投余藥一丸蛙無類矣童子將用之余曰不可復爲賦示之

夏雨初止積潦過尺有蛙百千更跳互出幸此新
 霽夜月清溢我勞其休歸偃於室于時蛙鳴若
 啼若訴若歌若歡若悲若喜而語若怒而詬若
 噉而嘔若咽而嗽瘖者之呼吃者之鬪或急或
 緩或清或濁若羗絲野鼓雜亂無節兮又似夫
 蠻歌獠語詭怪之迭作也爾其困於泥潦失其
 處所而悲又若夫旱暵既久得其所處而樂也
 爰有童子持燭來謁曰蛙羣夜鳴君寢其聒
 考之周官西灰驅蛤君其教之余得盡殺余語
 童子爾無是酷爾樂而歌而哀則哭哭則悲嗟
 樂有聲曲聚語群爭引吭而呼一日之間不寧
 須臾蛙不汝嫌汝奚蛙誅萬物一府誰好孰惡
 爾奚自私已厚蛙薄參適彼已樂我自然弭爾
 怒心置燭而眠夜半張子援枕而吁顧謂童子
 記余言歟前言既請卒吾說物各有時夫誰敢
 遏爾觀夫春露初霽朝華始敷文羽清喙飛鳴
 自如若奏琴箏而和笙竽清耳悅心聽者為娛
 及夫陽春既徂炎火將極惡草蕃遮淫潦渚積
 蛙於此時生養蕃息跳梁號呼意氣橫逆子如
 之何時不可逆時乎時乎美惡皆然當其盛時

誰得而遷及其霜雪既降木實草衰飛蠅聚蚊
孽無所施於是蛙歛吻收足兀然土中一聲不
出黨散巢披不可終日盛不可常與衰迭來子
姑忍之奚以殺為哉

怒蛙說

陳君舉

日有烏月有蛙蛙與烏相遇烏戲蛙曰若鬻肉
耳躍之高不咫尺焉能為哉蛙曰吾已矣若無
斬我烏曰若亦能怒耶蛙曰吾翹吾腹翳太陰
之光呀吾頤啗其壤矐吾目列星不敢輝奚而
不能怒若不吾信月于望吾怒以示若其望果

無光他日蛙過焉曰曩吾怒得無惕乎烏曰若
焉能惕我哉吾振吾羽翳太陽之光肆吾味喙
其壤徐以三足蹴之天下不敢寧而居吾視若
之怒眇矣奚以若惕為若不吾信月于朔吾怒
以視若其朔日果無光畚人伐鼓馳且走焉又
他日烏遇蛙曰吾怒也何如蛙曰始吾謂極威
矣而不知子之威震於我也日之馭曰羲和傍
聞之曰噫何謂威吾疾其驅六龍不敢稽其輶
吾赫其燥雲不敢雲雨不敢雨風不敢風八土
之埏吾能赫其膚萬壑之陰吾能充其毛百川

之流吾能杜其液且彼與若敢言怒哉若不吾
信吾怒以示若於是果旱暵者半載凡天地之
間病之他日羲和遇烏曰吾怒也何如烏赧然
曰始吾謂極威矣而不知子之震於我也飛廉
豐隆屏翳者聞之相與造羲和謂焉曰若驚而
怒耶向吾威示若吾三人焉噓其氣足以幕乾
坤之倪噀吾味足以赭崧華之峯嘯吾聲足以
簸四海掀九州而覆之也時也若烏能威言未
既豐隆噓焉屏翳噀焉飛廉嘯焉莫晝莫夜彌
山漫谷者亦半載嗚呼竊造化之權而私以怒
競民物奚罪哉

古詩

蝦蟆

白居易

嘉魚薦宗廟靈龜貢邦家應龍能致雨潤我百
穀芽蠢蠢水族中無用者蝦蟆形穢肌肉腥出
沒于泥沙六月七月交時雨正霽霑蝦蟆得其
志快樂無以加地既蕃其生使之族類多天又
與其聲得以相喧譁豈惟西池上汙君清冷波
可獨瑤瑟前亂君鹿鳴歌常恐飛上天跳躍隨
姮娥往往蝕明月遣君無柰何

答柳柳州食蝦蟆 韓愈

蝦蟆水中居水特變形貌強號為蛙蛤於實無
所校雖然兩股長其柰背脊跳跳躑躑雖云高意
不離寧淖鳴聲相呼和無理秭取鬧周公所不
堪灑灰垂典教我棄愁海濱常願眠不覺叵堪
朋類多沸耳作驚爆端能敗笙磬仍工亂學校
雖蒙勺踐禮竟不聞報効大戰元鼎年孰強孰
敗撓君然當鼎味豈不辱鈎罩余初不下喉近
亦能稍稍常懼染蠻夷平生性不樂而君復何
為甘食此豢豹獵較務同俗全身斯為孝哀哉
思慮深未見許迴擢

學韓退之體賦蝦蟆一篇

洪駒父

吾廬逼沮洳蛙蛤宗生之委委見科斗閤閤已
在茲夜聲一何喧達旦乃寢微月令紀螻蝈語
默亦有時豈伊不平鳴沓沓竟何為那復當鼓
吹安能問官私吾聞崑崙下厥大數十圍蟾蜍
窟望舒色勝金裊蹄癡駭反蝕月吞吐誰能知
坎井我自足跳梁而持順鱉笑色無愠鶉化理
莫推疥體不自惜或以調鹽醢柳州味南烹下

筋甘若飴在昔薦宗廟乃與羔兔齊擅減幾被坐
巨細不可遺莫以腥臊棄終朝瑚璉期

藏之和予蝦蟆短調再作之因以策

事

洪駒父

蝦蟆何爲者非磊砢於背人言懷土蟲棄去俄
復在昔有係青繒酉陽志其怪嘗觀三物圖副
以螂蛆帶相持莫先動含毒相屠膾端欲兄龜
龍未肯第孔翠俳語解人頤子陽妄尊大慎勿
離窟穴旁午凡五輩東行犯日忌束縛非其罪
儻有切玉刀甘心脂鼎鼎平生不下筋實憚背
脊疥何必食馬肝前脩有明戒願君勿嘲誚微
命其可貸

再和一首

洪駒父

動物類含血蝦蟆獨無之雙目但瞳也一腹亦
嗜其龍變或託體魚服覩幽姿罕見三足蟾詐
減六眸龜向來奏贗瑞背負輪困芝坐謾皆下
吏膠車等兒嬉雖蒙黃金擲荆卿空爾爲或以
白玉琢形模妙工倭咄爾百醜質詎辱五鼎脂
浪號土底鴨雄誇水中雞何足汙帝著但可充
蛇飢作意一池鳴和我五字詩

初聞蛙

梅聖俞

朝聞南籬梅暮聞北池蛙
何時科斗生草根已
吐芽只畏草葉長其下
可隱蛇游子且勿行科
斗成蝦蟆

蝦蟆

蘇子瞻

悍目知誰瞋瞞腹空自脹
慎勿困蜈蚣飢蛇不
汝放

律詩

池蛙

宋子京

越國車前矜勇甚子陽井底太驕生
乘時不羨

雲溟樂口作儀同鼓吹聲

齊張狗兒將拜儀同口自作鼓吹聲

聞蛙

朱元晦

兩蛙盛怒鬪春池群吠同聲徹
曉惟等是一場
狼籍去更無人與問公私

和聞蛙

楊廷秀

春來真底好此輩正縱橫
身作泥中計聲從雨
後增北人餐未慣南食眼
猶生灰灑知虛實於
渠似可行

蚯蚓

羣書要語

也螻切羣引螻即蜚蠊也爾雅螻螻螻

一名土龍一名螻螻本草一名曲蠊古今注孟

夏螻螻出冬至之日螻螻結月令夫螻上食槁

壤下飲黃泉孟子

古今事實

黃帝螻瑞

黃帝時螻大如虹世紀黃帝時見大螻土氣勝

故其色尚黃呂氏春秋

螻兆隋亡

陳後主時隋軍至江螻螻盡出森然如植箭陳

氏水鄉螻螻土蟲象陳氏自稱主德盡出明傾

其窟穴以曲歸直是歲隋平陳廣五行記

地多胸臆

唐以開州盛山郡地多胸臆虫也改為胸臆

郡

古今文集

雜著

螻螻賦

東方虬

惟陰陽之播氣寔萬類以呈形有微虫之稟質

應甲子而濕生雨欲垂而乃見暑既至而先鳴
乍透迤而鱗屈或宛轉而蛇行內之筋骨外無
手足任性行止物擊便曲徒進退而皓首竟不
知其所欲東西詰屈南北黃緣上食塵塊下飲
淵泉應軒轅上德之王入蔡邕勸學之篇其體
甚微其用至專瑾泥塗以自保觸鹽滋而罔全
豈造化之賦命信歸之於自然

雜記

歐陽永叔

蚓食土而飲泉其為生也簡而易足然仰其穴
而鳴若號若呼若嘯若歌其亦有所求耶抑其
求易足而自鳴其樂耶其生之陋而自悲其不
幸耶將自喜其聲而鳴其類耶豈其時至氣作
不自知其所以然而不能自止者耶何其聒然
而不止耶吾於是乎有感

蜥蜴

蜥虎 守宮同

羣書要語

蝮蝮蜥蜴 蝮蜴守宮也 爾雅一名
蛇豎 詩疏 在壁曰蝮蜴在草曰蜥

蜴或稱蜥虎

說文

蝮蜴

一曰守宮一曰龍子善

於樹上捕蟬食之其長細五色者名為蜥蜴其

短大者名爲蝾螈一曰蛇鑿大者長三尺其色
玄紺善魅人古今注大能鳴者謂之蛤蚧方言
哀今之人胡謂虺蜴詩正月

古今事實

蜥蜴求雨

甕盛蛇鑿

並見祈雨門

覆射守宮

見覆射門

守宮飾女臂

取守宮牝牡各一藏之甕中陰乾百日以飾女
臂則生文章與男子合陰陽輒滅去淮南畢萬

術一說取蜥蜴以器養之食以朱砂體盡赤擣

萬杵以點女人肢體終身不滅若與男合則滅

故曰守宮
博物志

古今文集

古詩

蝮虎

蘇子瞻

跂跂有足蛇脉脉無角龍爲虎君莫笑食盡蠹
尾虫

蝸牛

天水牛附

羣書要語

蚘羸蝮螭音移

注

即蝸牛也爾雅背

負圓殼者曰蝸牛無殼者曰蝘螭說

詩句

蝸涎蠹畫梁

杜牧之

斷墻著雨蝸成字

歐

天水牛

阜角木五六月多大黑甲虫俗呼為天

水牛

遯齋閑覽

古今事實

蠻觸交戰

有國於蝸之左角曰蠻氏右角曰觸氏爭地而戰伏尸數萬逐北旬有五日而後反莊子

蝸牛廬

見宅舍門

古今文集

古詩

蝸牛

蘇子瞻

腥涎不滿腹聊足以自濡升高不知休竟作粘壁枯

天水牛

蘇子瞻

兩角徒自長空飛不服箱為牛竟何事利吻穴枯桑

羣虫

羣書要語

有足謂之蟲無足謂之豸爾雅仲

春百蟲感動 仲秋百蟲坏戶目

今 啜啜草蟲趯趯阜蝻周南 蟲飛薨薨齊雞鳴

秋蟲響於廊宇曹工建秋興賦 夕草起寒螿之

愁同上 百蟲吟暮兮萬葉吟秋劉禹錫秋聲賦

以蟲鳴秋韓文

詩句 竹蟲音亂堦梁蕭子範 柳老半書蟲坡夜

雨鳴寒蛩 露草濕寒蛩並后山 青蟲相對吐

青絲唐詩 秋風浙瀝鳴清商秋草未死啼寒螿

朱文公

蜻蜓 赤弁丈人古今注

詩句 蜻蜓立鉤絲杜 點水蜻蜓款款飛杜 風蒲

獵獵弄輕柔欲立蜻蜓不自由參寥 池面蜻蜓

去復來唐詩 無數蜻蜓齊上下杜

古今事實 闕

古今文集

古詩

莎雞 張文潛

金風肇殘伏玉樹生秋涼啜啜草間蟲感時振
衣裳楚客萬里思夜吟怨藜床勞勞終夕語七

此簷月光孤輪曳獨繭折管韻哀鏗辛苦函
兄無衣畏風霜

律詩

聞蛩

陳無已

晚風庭竹已秋聲初聽空堦蛩夜鳴流落天涯
聊自得今宵為爾感平生

秋蟲


楊廷秀

蟬哀日落恰纔收蛩怨黃昏正未休催得世人
頭總白不知替得二蟲愁

蜻蜒

韓渥

碧玉眼睛雲母翅輕於粉蝶瘦於蜂坐來近拂
波光舞又是慙慙為蓼叢




新編古今事文類聚卷之五十

後集



左
右
久



集

圖

圖

集

題

卷